


0 10 20 30 40 50 60 70 80 90 100 110 120 130 140 150 160 170

1
2
3
4
5
6
7
8
9
10
11
12
13
14
15
16
17
18
19
20
21
22
23
24
25
26
27
28
29
30
31

Kodak Color Control Patches



22-6573
6162.073
14

盱眙縣志彙卷九

人物

地介江淮宜產魁碩之士然秦漢以來正史外書缺有
 間矣明代龍興岐陽雲屬英彥繼起迄於今茲銘鼎鐘
 而垂竹帛豈徒里乘光與其有巖穴之彥邃學篤行或
 能自持其身勉於為善可以型俗及一藝足錄者以時
 詮次而流寓附焉至咸豐己未庚申間髮捻交訌城鄉
 淪陷紳民以義烈著者不下千數百人采訪所及雖事
 蹟莫詳亦臚列其姓氏云

漢



陳嬰故東陽令史居縣中素信謹稱為長者東陽少年
 殺其令相聚數千人欲置長無適用乃請嬰嬰謝不能
 遂彊立嬰為長縣中從者得二萬人欲立嬰便為王異
 軍蒼頭特起陳嬰母謂嬰曰自我為汝家婦未聞汝先
 古之有貴者今暴得大名不祥不如有所屬事成猶得
 封侯事敗易以亡非世所指名者也嬰乃不敢為王以
 兵屬項梁為楚上國封五縣與懷王都盱眙史記項羽本紀
 羽死屬漢定豫章浙江都漸顏注漸水名在丹陽黟縣南蠻中嬰既定諸地而都
 之定自為王壯息顏注時又有壯息者僭稱王嬰討平之按史記自為王上佚定字致字義
不明今從漢書補之高祖六年封堂邑侯千八百戶漢書表作六百戶復

相楚元王卒子恭侯祿嗣卒孫午嗣尚長公主嫖文帝女

元光六年午子須嗣侯有罪自殺國除史記高祖力臣年表

武涉盱眙人高祖四年韓信平齊王信為齊王徵其兵

擊楚楚已亡龍且項王恐使涉往說信曰天下苦其秦

久矣相與戮力擊秦秦已破計功割地分土而王之以

休士卒今漢王復興兵而東侵人之分奪人之地已破

三秦引兵出關收諸侯之兵以東擊楚其意非盡吞天

下者不休其不知厭足如是甚也且漢王不可必身居

項王掌握中數矣項王憐而活之然得脫輒倍約復擊

項王其不可親信如此今足下雖自以與漢王為厚交

為之盡力用兵終為之所禽矣足下所以得須臾至今者以項王尚存也當今二王之事權在足下足下右投則漢王勝左投則項王勝項王今日亡則次取足下足下與項王有故何不反漢與楚連和三分天下王之今釋此時而自必於漢以擊楚且為智者固若此乎韓信謝曰臣事項王官不過郎中位不過執戟言不聽畫不用故倍楚而歸漢漢王授我上將軍印予我數萬眾解衣衣我推食食我言聽計用故吾得以至於此夫人深親信我我倍之不祥雖死不易幸為謝項王涉遂去

淮陰侯列傳

田君孺東陽人雖為俠而逡逡有退讓君子之風

史記游俠

傳 索隱漢書作陳君孺然陳田聲相近亦本同姓也正義其東陽蓋貝州厯亭縣者為近齊故也按漢清河郡臨淮郡皆有東陽此次臨淮下當是臨淮之東陽

三國魏

陳矯字季弼廣陵東陽人也避亂江東及東城辭孫策

袁術之命還本郡太守陳登請為功曹使矯詣許謂曰

許下論議待吾不足足下相為觀察還以見誨矯還曰

聞遠近之論頗謂明府驕而自矜登曰夫閨門雍穆有

德有行吾敬陳元方兄弟淵清玉潔有禮有法吾敬華

子魚清修疾惡有識有義吾敬趙元達博聞強記奇逸

卓犖吾敬孔文舉雄姿桀出有王霸之略吾敬劉玄德所敬如此何驕之有餘子瑣瑣亦焉足錄哉登雅意如此而深敬友矯郡爲孫權所圍於匡奇登令矯求救於太祖矯說太祖曰鄙郡雖小形便之國也若蒙救援使爲外藩則吳人挫謀徐方永安武聲遠震仁愛滂流未從之國望風景附崇德養威此王業也太子奇矯欲留之矯辭曰本國倒懸本奔走告急縱無包胥之效敢忘宏演之義乎太祖乃遣赴救吳軍旣退登多設間伏勒兵追奔大破之太祖辟矯爲司空掾屬除相令征南長史彭城樂陵太守魏郡西部都尉曲周民父病以牛禱縣結正棄市矯曰此孝子也表赦之遷魏郡太守時繫囚千數至有厯年矯以爲周有五典之制漢約三章之法今惜輕重之理而忽久繫之患可謂謬矣悉自覽罪狀一時論決大軍東征入爲丞相長史軍還復爲魏郡轉西曹屬從征漢中還爲尙書行前未到鄴太祖崩洛陽羣臣拘常以爲太子卽位當須詔命矯曰王薨於外天下惶懼太子宜割哀卽位以繫遠近之望且又愛子在側彼此生變則社稷危矣卽具官備禮一日皆辦明旦以王后令策太子卽位大赦蕩然文帝曰陳季弼臨大節明略過人信一時之俊傑也帝旣踐阼轉署吏部

封高陵亭侯遷尚書令明帝卽位進爵東鄉侯邑六百
戶車駕嘗卒至尚書門矯跪問帝曰陛下欲何之帝曰
欲案行文書耳矯曰此自臣職分非陛下所宜臨也若
臣不稱其職則請黜退陛下宜還帝慙回車而反其亮
直如此加侍中光祿大夫遷司徒景初元年薨諡曰貞
侯子本嗣歷位郡守九卿所在操綱領舉大體能使羣
下自盡有統御之才不親小事不讀法律而得廷尉之
稱優於司馬岐等精練文理遷鎮北將軍假節都督河
北諸軍事薨子粲嗣本弟騫咸熙中爲車騎將軍初矯
爲郡功曹使過泰山泰山太守東郡薛悌異之結爲親

友戲謂矯曰以郡吏而交二千石鄰國君屈從陪臣游

不亦可乎悌後爲魏郡及尚書令皆承代矯云

魏志本傳劉

曄以先進見幸因譖矯專權矯懼以問長子本本不知
所出次子騫曰主上明聖大人大臣今若不合不過不
作公耳後數日帝見矯矯又問二子騫曰陛下意解故
見大人也旣入盡日帝曰劉曄構君朕有以迹君朕心
故已了以金五餅授之矯辭帝曰豈以爲小惠君已知
朕心顧君妻子未知故也帝憂社稷問矯司馬公忠正
可謂社稷之臣乎矯曰朝廷之望社稷未知也矯本廣
陵劉氏爲外祖陳氏所養因而改焉

晉書劉頌傳頌嫁女臨淮陳矯矯本

劉氏子與頌近親出養於姑改姓陳氏中正劉友譏之
頌曰舜後姚虞陳田本同根系而世皆為婚禮律不禁
今與此同義為婚可也友方欲列上為陳騫所止故得
不効頌問明法掾陳默蔡畿曰鄉里誰最屈二人俱云
劉友屈頌作色呵之畿曰友以私議冒犯明府為非然
鄉里公論稱屈魏氏春秋曰矯本劉氏子出嗣舅氏
而婚於本族徐宣每非之庭議其闕太祖惜矯才量欲
擁全之乃下令曰喪亂已來風教彫薄謗議之言難用
褒貶自建安五年已前一切勿論其以斷前誹議者以
其罪罪之世語曰本字休元歷郡守廷尉所在能使
羣下自盡有率御之才不親小事不讀法律而得廷尉
之稱遷鎮北將軍晉陽秋曰騫字休淵司徒第二子無
謬誇風滑稽而多智謀仕至大司馬名士傳曰玄以鄉
黨貴齒本不論德位年長者必為拜與陳本母前飲騫
來而出其可得同
不可得而雜者也

晉

陳騫臨淮東陽人父矯魏司徒騫沈厚有智謀初矯為

尚書令侍中劉暉見幸於魏明帝譖矯專權矯懼以問
長子本本不知所出騫曰主上明聖大人大臣今若不
合意不過不作公耳後數日帝見矯矯又問二子騫曰
陛下意解故見大人也既入盡日騫尚少為夏侯元所
侮意色自若起家尚書郎遷中山安平太守並著稱績
徵為相國司馬長史御史中丞遷尚書封安國亭侯蜀
賊寇隴右以尚書持節行征蜀將軍破賊而還會諸葛
誕之亂復以尚書行安東將軍壽春平拜使持節都督
淮北諸軍事安東將軍進爵廣陵侯轉都督豫州諸軍
事豫州刺史持節將軍如故又轉都督江南諸軍事徙

都督荊州諸軍事征南大將軍封郟侯武帝受禪以佐命之勳進車騎將軍封高平郡公遷侍中大將軍出爲都督揚州諸軍事餘如故黃鉞攻拔吳枳里城破涂中屯戍賜騫兄子悝爵關中侯咸甯初遷太尉轉大司馬騫因入朝言於帝曰胡烈牽弘皆勇而無謀強於自用非綏邊之材將爲國之恥願陛下詳之時弘爲揚州刺史不承順騫命帝以爲不協相構於是徵弘旣至尋復以爲涼州刺史騫竊歎息以爲必敗二人後果失羌戎之和皆被寇喪沒征討連歲僅而得定帝乃悔之騫少有度量含垢匿瑕所在有績與賈充石苞裴秀等俱爲心膂而騫智度過之充等亦自以爲不及也累處方任爲士庶所懷旣位極人臣年踰致仕思欲退身咸甯三年求入朝因乞骸骨賜袞冕之服詔曰騫元勳舊德統又東夏方遠績以一吳會而所苦未除每表懇切重勞以方事今聽留京城以前太尉府爲大司馬府增置祭酒二人帳下司馬官騎大軍鼓吹皆如前親兵百人厨田十頃厨園五十畝厨士十人器物經用皆留給焉又給乘輿輦出入殿中加鼓吹如漢蕭何故事騫累稱疾辭位詔曰騫履德論道朕所咨詢方賴謀猷以宏庶績宜時治事可遣散騎常侍諭意騫輒歸第詔又遣侍

中敦諭還府遂固請許之位同保傅在三司之上賜以
几杖不朝安車駟馬以高平公還第帝以其勳舊耆老
禮之甚重又以騫有疾聽乘輿上殿騫素無謬諤之風
然與帝語傲及見皇太子加敬時人以爲詔弟稚與其
子輿忿爭遂說騫子女穢行騫表徒弟以此獲譏於世
元康二年薨年八十一加以袞斂贈太傅諡曰武及葬
帝於大司馬門臨喪望柩流涕禮依大司馬石苞故事
子輿嗣爵輿字顯初拜散騎常侍洛陽令遷黃門侍郎
歷將校左軍將軍大司農侍中坐與叔父不睦出爲河
內太守輿雖無檢正而有力致尋卒子植字宏先嗣官

至散騎常侍卒子粹嗣永嘉中遇害孝武帝以騫玄孫

襲爵卒弟子浩之嗣宋受禪國除晉書本傳

劉翼淮陵人王敦叛時譙閔王承監湘州諸軍事便欲

唱義而眾心疑惑承曰吾受國恩義無有貳府長史虞

悝慷慨有志節於是悝及弟前丞相掾望建昌太守長

沙王循衡陽太守淮陵劉翼等共盟誓囚桓羆敦參軍遣說承

者馳檄湘州指期至巴陵零陵太守尹奉首同義謀敦

遣魏父李恆等甲卒二萬以攻承承且戰且守待叔於

尹奉虞望而城池不固人情振恐外援不至父等攻戰

日逼劉翼戰死城遂沒晉書同治志是時淮陵已縉

當為舊淮陵人今按資治通鑑沛國劉臻胡注隋志無沛國劉臻先世仕於江南江南僑置中原郡縣猶以沛國為貫同治志或原於此

宋

王彭盱眙直瀆人少喪母元嘉初父又喪亡家貧力弱無以營葬兄弟二人晝則傭力夜則號感鄉里並哀之乃各出夫力助作塋塋需水而夫旱穿井數十丈泉不出墓處去淮五里荷儋遠汲困而不周彭號天自訴如此積日一旦大霧霧歇塋竈前忽生泉水鄉鄰助之者並嗟神異縣邑遠近悉往觀之葬竟水便自竭元嘉九年太守劉伯龍依事表言改其里為通靈里蠲租布三

世南史孝義傳

陳

馬明字世朗盱眙人梁世事鄱陽嗣王蕭範侯景之亂據廬江之東界拒賊臨城柵元帝授散騎常侍平北將軍北兖州刺史領廬江太守荊州陷沒歸于高祖紹泰中復官位封西華縣侯邑二千戶隨陳文育西征王琳於沌口軍敗明力戰死之贈使持節征西將軍郢州刺

史陳書周鐵虎傳

五代

劉金曲溪人

九國志作洪澤人今從十國春秋

光啟中江淮兵亂從鄉

子台系志

卷九 人物

九

酋李章保曲溪今名劉李岡因金章改名章死金代有其眾以驍勇

知名行密營廣陵金盡以其眾來附九國志居三十六英

雄之一十國春秋破秦彥金有力焉文德初從攻趙鏗於陵

陽明年金度鏗必遁思以計禽之因偽與鏗通好約為

外應鏗大喜以金帛為遺復夜迎金入臥內許妻以女

金歸營慮鏗兵盛出不能制乃遣人臨城大譟云劉郎

不能與爾為女婿也鏗聞之沮喪果宵遁大順中孫儒

寇宛陵行密遣金拒之屢破儒軍以功授滁州刺史行

密破鍾離移濠州刺史未幾遷團練使威名大振天祐

二年十一月卒子仁規知濠州頗苛刻用事未協眾論

嗣仁規娶行密女渥襲位遷渦口兩城使乾貞初授清

淮軍節度使九國志卒子崇俊復刺史濠州凡三世濠

梁為一時之盛十國春秋按滁州菱谿有金故宅遺址

南唐

劉仁贍字守惠金季子金事吳武王有戰功仁贍略通

儒術好兵書有名於唐書中陸游南為將輕財重士法令

嚴肅事烈祖為左監門衛將軍黃袁二州刺史入為龍

衛軍都虞侯拜鄂州節度使馬令南唐書元宗伐楚仁贍帥

州師克巴陵撫納降附甚得人心入掌親軍保大中湖

湘戍兵潰歸復失故楚地上書者多謂周人有南侵之

謀淮上石偶人言元宗聞而惡之斷其首自六月至冬不雨長淮可涉民流入周邊城遮殺之不能禁唐亦興屯田修邊備以壽州最爲要地十三年徙仁贍爲清淮軍節度使自楊氏有吳歲暮淮涸輒增戍以備侵軼謂之把淺監軍吳廷紹以爲無事徒費糧糗罷之仁贍表陳不可罷未及行周已遣將李穀王彥超韓令坤等帥師大入詔書暴我納李金全援李守貞慕容彥超結契丹太原之罪報至上下失色仁贍獨部分號令宴勞將士閒暇如平時十一月出兵破城南大柵殺周兵數千人元宗遣仁武統軍劉彥貞將三萬人救壽州十四年

正月彥貞至來遠鎮距壽州二百里軍容甚盛李穀燒營夜遁保正陽彥貞率戰艦數百艘泝淮而上仁贍曰敵已畏君矣當持重養威以俟閒若遽求戰而不能勝則大事去矣彥貞不從仁贍曰周仁遁必設伏遇之將敗乃率勵其下益兵固守彥貞果大敗沒於陣伏尸三十餘里亡戈甲三十萬周世宗自將攻城屯於城西北肥水之陽徵宋博陳穎許蔡徐宿州丁夫數十萬備攻城雲梯洞屋下臨城中數道同時進攻又束巨竹數十竿上施版屋號爲竹龍載甲士又決其水砮入肥河填塹陷壁晝夜不少休如是者累月每鼓角四發聲震牆

壁皆動我援兵在外者見利輒進常陷伏中以故屢敗而終不悟仁贍雖知外援之敗而意氣甚壯覘世宗在城下據胡牀督攻城仁贍素善射自引弓射之箭去胡牀數步輒墮世宗命進胡牀於箭墮處後箭復遠數步而墮仁贍投弓於地曰若是天果不佑唐邪吾有死於城下耳終不失節於是世宗遣中使來諭曰知卿忠義然士民何罪又親駕臨城招之皆不從自正月至四月不可下而歲大暑霖雨彌旬周兵營寨水深數尺淮肥暴漲礮舟竹龍皆飄南岸爲唐兵所焚周兵多死世宗還京師揚秦滁和舒蘄諸州皆復爲唐守渦口定遠周

兵戍守者亦爲我師襲破江左幾復振而壽州之圍獨不解世宗東趨濠梁以李重進爲廬壽都招討使元宗遣元帥齊王景達以兵數萬來援分重兵據紫金山列寨數十餘處與城中傳烽相應築甬道抵城通饋餉六月周彭信李繼勳等營城南仁贍伺繼勳無備出兵殺周兵數百焚攻城洞屋甚眾而重進與張永德兩軍相疑不協兵力頗屈仁贍因請乘世宗之歸以邊鎬守城自出決戰景達畏懦又方任陳覺固不許仁贍憤鬱得疾少子崇諫幸其父病夜泛小舟渡淮謀與諸將出降爲軍校所執仁贍立命斬之監軍使文德殿使周廷構

哭於中門又求救於仁贍妻薛氏曰崇諫少子固所不
忍然貸其死則劉氏爲不忠之門促命斬之然後成喪
聞者皆爲出涕士卒感泣願以死守十五年二月世宗
復親征屢戰皆克唐軍被俘馘者四萬餘人餘眾不復
整朱仁朱元裕孫璘皆降周仁贍聞之扼吭憤歎世宗
使江南使者孫晟等至城喻仁贍降晟望城中改其辭
呼曰無墮臣節援兵卽至矣仁贍城守益堅世宗知壽
州且下心獨嘉仁贍之忠恐城破殺之乃下詔諭使自
擇禍福三月甲辰又耀兵城北仁贍已困篤不知人丙
午監軍周廷構營田副使孫羽等詐爲仁贍表遣使奉

之請降丁未世宗賜仁贍詔遣閣門使萬年張保績入
城宣諭仁贍子崇讓復出謝罪戊申世宗大陳甲兵受
降於城北廷構等昇仁贍出城仁贍臥不能起世宗慰
勞賜資賜以玉帶御馬拜天平軍節度使兼中書令命
還城養疾辛亥晝晦雨黃沙如霧世宗在下蔡疑有變
馳騎覘之乃仁贍以是日卒年五十八州人皆哭偏裨
及士卒自剄以殉者數十人

陸游南唐書

世宗制曰劉仁贍

盡忠所事抗節無虧前代名臣幾人可比予之南伐得
爾爲多遣使弔祭喪事官給追封彭城郡王錄其子崇
讚爲懷州刺史賜莊宅各一區壽州故治壽春世宗以

其難克遂徙城下蔡而復其軍曰忠正曰吾以旌仁贍之節也元宗聞仁贍死哭之慟亦贈太師中書令諡忠肅焚其誥曰魂兮有知鑒周惠邪歆吾命邪是夕夢仁贍拜謝庭中若受命然馬令南唐書加封衛王後主立進封越王開讀中仁贍子崇諒爲進奉使太祖嘉其忠臣之後崇讚仕周累爲郡守特命爲都官郎中越百餘年政和時列仁贍於祀典至今廟食壽春廟曰忠顯仁贍死時妻薛氏五日不食而卒陸游南唐書

劉崇俊字德修祖金父仁規世典濠州崇俊繼之盡反仁規之政人懷其惠居數年漸專恣不法多畜不逞使

過淮剽掠獲美女良馬以自奉元宗升濠州爲定遠軍拜崇俊節度使以其子節尙太甯公主然元宗亦惡其爲人會壽州姚景死崇俊厚賂權貴求兼領壽州元宗陽若不解其意命移鎮壽州而遣楚州刺史劉彥貞馳入濠州代之崇俊自悼失計頗革心循法度未幾得疾卒年四十贈太尉諡曰威十國春秋

賈令威盱眙人驍果有勇名太祖官廬州日發兵至廣陵令威與劉金帥其所部中道來屬隸戲下爲親軍太

祖兵遂日盛焉

十國春秋

宋

杜輿字子師特立好義不妄許可授徒家塾與妻孥卒歲相保晏如也雅善蘇東坡酬唱往來甚款曲元豐中東坡在黃州輿自臨淮往謁晁補之為作子師字說後東坡南謫過泗州與子師別在惠州嘗有書答子師云得喪常理正如子師及第落解耳靖國初南還又與子師書非久會面欣愜之極並書和陶飲酒二十篇與之當東坡在儋耳子師欲盡鬻家所有攜妻以往相會東坡內徙乃已東坡集注晁无咎杜輿子師名字序野字之曰子師子師道先生之言曰夫能載而後可與言輿能眾而後可以言師夫能載則能眾矣故輿有師義則又從先生之門人晁補之求識其說補之曰甚矣先生所以望子師者至矣夫車之有輿也猶宮之有堂也

猶人之有心腹也崇墉長廡溝之於其外閭然後門門然後堂而堂者宮之所宅也目視耳聽手扞衛而足運趨元首加焉而腹心者人之輿也故謂之輿則一車之任舉在矣立斲橫軹軻環澗而牙固抱二十有八為其蓋弓三十其輻合之於一轂以濟其中之所無有而後可以受天下之有凡物之不至者託至焉是其材君子之材也其器國器也御閑而右勇善用其材者也得時則駕見險而能止不犯難者也以經營四方與舟楫之絕江河同利故天下無不待之以濟而附者不一是之謂能載則能眾也曰雖然孰能任之孟子所謂異人以存心者能任之以如日雖然孰能任之孟子所謂異人亦祇以異何以能眾吾且以其異而眾無不同乎彼則以同者莫適同而已然後君子之道大而為眾率賈誼曰鳳凰翔於千仞兮覽德輝焉下之鳳不世見故人未始識鳳則藩籬之燕雀蓬中之斥鷃何從識之雖然鳳舉而鳥朋矣鳳非以其異故能同耶不然則鳥之從鳥扈之羣扈亦可以為同耶而同者狹矣故曰甚矣先生所以望子師者至矣昔者伊尹其道有在於此思天下匹夫匹婦有不被堯舜之澤者如己推而納之溝中而天下亦皆以是歸之道足任而時可為也易曰大車以

載積中不敗是其所以能有大也陳蕃亦可謂有其志矣不埽一室而欲以身援天下志大而力不勝義可以立而身見危是知其不可而為之者也易曰輿脫輹夫妻反目天下不可輕為而近用也然亦不可告也山以其高而獸往之川以其深而魚聚之君子以其道可與任重而致遠故窮則得士達則得民不幸而終其身不試而君子論之與禹稷同道子師勉之東坡集書晁无咎所作杜輿子師字說後易曰君子得輿下完而上未具也小人剝廬終不可用也夫君子得輿下完而上未具也民將載之上壯而下撓疾走不顧猶懼壓焉今君學修於身行修於家而祿未及既完其下矣故子以是名字之與无咎意初無異者而其文約其義近不足以發夫人之志若无咎者可謂富於言妙於理者也又贈子師詩予少年頗知種松手植數萬株皆中梁柱矣都梁山十年春雨長髯龍如今尺五城南杜欲向東坡種種松君方掃雪收松子我已開榛得茯苓為問何如種楊柳明年飛絮作浮萍晁補之和詩東坡公以種松法授都梁杜子師并為作詩子師求余同賦不學栽橙業種

松未慙履狶笑屠龍許君盡得東坡術已與先生一事同 翁方綱米海岳年譜米公自言與二子友仁友知

同校刻泗州南山杜氏所藏蘭亭不著歲月今此帖無攷今按杜氏朱知即輿否

楊介字吉老 輿地紀勝作楊玠老 淮孺小記引雲麓

志茅山道士條又誤 工醫舉孝廉不就徽宗飲冰困苦為揚州人今從宋史

脾疾國醫治以理中丸不效召介視之仍用理中丸以

冰煎服立愈楊立之自廣州通判歸楚州喉生癰腫潰

膿血流注寢食皆廢醫者束手適吉老來郡立之兩子

往邀之至熟食良久曰不須看脈已得之矣此疾甚異

須先啖生薑片一斤乃可投藥否則無法子有難色謂

喉中膿潰痛楚豈宜食薑立之曰吉老醫術通神言必

不妄試啖我初食殊甘香稍益至半斤許痛漸已滿一斤始覺味辣膿血頓盡粥餌入口無滯礙明日招吉老謝而問之對曰君官南方必多食鷓鴣此禽好食半夏久而毒發故以生薑制之今病源已清無庸服他藥也

夷堅志曾
慥類說

有富翁子忽病視正物皆以爲斜几案書席之類排設整齊必更移令斜自以爲正以至書寫尺牘莫不皆然父母甚憂之更歷數醫皆不諳其疾或以吉老告遂以子往來治既診脈後令其父先歸留其子設樂開宴酬勸無算至醉乃罷扶病者坐轎中使人舁之高下其手常令顛倒展轉久之方令坐榻而臥達旦酒

醒遣之歸家前日斜視之物皆理正之父母躍然而喜且詢治之方吉老云令嗣無他疾醉中嘗閃倒肝之一葉搭於肺上不能下故視正物爲斜今復飲之醉則肺脹展轉之間肝不下垂矣藥安能治之哉富翁厚爲之酬

證治準繩引
雲麓漫鈔

一士人狀若有疾厭不卽賴莫能名

其何等病苦往謁之介曰君熱證已極氣血消燦且盡自此三年當以背疽死不可爲矣士人不樂而退聞親識閒說茅山觀中一道士於醫術通神但不肯以技自名未必爲人致力士人心計交切乃衣僮隸之服指山拜之願得執薪水之役於席下道士喜留置弟子中海

以讀經晝夕祇事左右頤指如意歷兩月久覺其與常
 隸別呼叩所從來始再拜謝過以實白之道士笑曰世
 間那有醫不得病汝宜試以脈示我纔診視又笑曰汝
 便可下山吾亦無藥與汝但日日食好梨一顆如生梨
 已盡則取乾者泡湯飲之仍食其滓此疾當自平士人
 歸謹如其戒經一歲復往揚州吉老見之驚其鬚貌腴
 澤脈息和平謂之曰君必遇異人不然豈有痊安之理
 士人以告吉老具衣冠焚香往茅山設拜蓋自咎學之
 未至也夷堅志王定國病風頭痛至都梁求明醫吉老
 治之連進三丸卽時病失懇求其方則用香白芷一味

洗曬爲末鍊蜜丸彈子大每嚙一丸以茶清或荆芥湯

化下遂命名都梁丸本草綱目吉老張耒甥也耒嘗贈以詩

亦重其醫賀鑄游盱眙南山亦贈介詩且云楊善方藥

著書甚多崇甯中得劇賊斬於市郡守李夷行遣醫並

畫工往視決膜摘膏盲曲折圖之盡得纖悉介以古書

校之無少異者著有四時傷寒從病論六卷存真圖一

卷視歐陽希五藏圖爲詳確云張耒柯山集喜吉老甥

我論詩朝達暮頗言行有日征舟下洛渚先君外孫子

惟爾冠侯侯又秋日喜楊介吉老寄藥詩間坊遠市聲

終日掩衡門惟有風中葉蕭騷終日聞午枕不成寐起
 坐無與言喜聞故人書珍藥幸見存其方受仙聖其效
 未易論豈惟蠲沈痾庶可稍本根珍重復珍重厥價萬
 璣璠永年未可有庶保無天昏賀鑄遊盱眙南山贈

楊介詩曉霜無輕颺長淮淨如眼招攜南山遊老子興
不淺不從干步橋飛渡一漁舫中流鼓素檝鮎鱖歛驚
跳禪叟延遊客恩恩問行色千里遠京關浮驂去安適
長嘯指滄浪濯纓前我裳朱門曳裾地槐柳自成行多
年困鞞版未立中人產沈痼迫衰遲求田咄何晚神
丸儻駐顏投此寄餘年鑿室鄰楊氏然薪繫太元

李植字元直泗州招信人宋史作臨淮人今從繫年錄

泗州載李植未核其為一人也幼明敏篤學兩舉於鄉從父中行客蘇

軾門太史晁無咎見之曰此國士也以女妻焉靖康初

高宗以康王開大元師府湖南向子諲轉運京畿時羣

盜四起餉道阨絕環視左右無足遣者有以植薦遂借

補迪功郎使督四百艘總押犒師銀百萬糧百萬石招

募忠義二萬餘眾自淮入徐趨濟凡十餘戰卒以計達

宋史向子諲傳康王次濟州子諲遣進士李植
獻金帛及本司錢穀之在濟州者以助軍費時高宗

駐師鉅野聞東南一布衣統眾而至士氣十倍首加勞

問植占對詳敏高宗大悅親賜之食曰得一士如獲拱

璧豈特軍餉而已承制授承直郎一統志作除戶部員外郎留之幕

府植三上表勸進願蚤正大寶以定人心以應天意三

降手札獎諭植感激知遇言無不盡為汪伯彥黃潛善

所忌高宗既即位為東南發運司幹辦公事繫年錄紹興元年五

月丙辰范溫知上駐蹕會稽遂遣參軍事李植等三十

二人泛舟赴行在八月丁卯植至行在上嘉之以溫為

武翼郎閣門宣贊舍人統制山東忠義尋以奉議郎知
潭州湘陰縣經楊公蕩析植披荆棘立縣治發廩粟振

困乏專以撫摩為急丞相張浚督師江上知植才薦為朝奉郎鄂州通判大盜馬友孔彥舟未平植請修戰艦習水戰分軍馬為左右翼大破彥舟伏兵誅馬友二盜平浚以破賊功上於朝轉朝奉大夫通判荆南府秩滿除尚書戶部員外郎時秦檜當國凡帥府舊僚率皆屏黜浚亦去國植即勾祠奉親寓居長沙之醴陵十有九年杜門不仕檜死子諱以戶部尚書居邇列語及龍飛舊事識植姓名除戶部郎中召植始入見帝曰故人也方有意大用以母老每辭願便養除知桂陽軍丁母憂歸葬哀毀廬墓有白鷺朱草之祥劉鎮遺之書曰忠臣

孝子元直兼之矣服闋參政錢端禮薦差知瓊州陞辭

帝慨然曰卿老矣瓊管遠在海外改知徽州徽俗崇尚

淫祠植首以息邪說正人心為事民俗變轉朝請大夫

直秘閣改知鎮江府遷江淮荆湘都大提點坑冶鑄錢

公事繫年錄紹興三十年五月丙戌初直秘閣江淮等

路提點坑冶鑄錢李植以巡歷過行在歲額錢內

藏庫二十三萬緡左藏庫七十餘萬緡皆是至道之後

額數自紹興以來歲收銅止及二十四萬緡鉛二十萬

助錫五萬緡此最多之數紐計鑄錢一十萬緡外有拘

到諸路銅器二百萬緡搭以鉛錫可鑄六十萬緡乃暫

時所拘乞據逐年所產權立為額事下工部至是本部

言若依所乞委是數年且以酌中之數五十萬緡為額

從之戊子賜江東轉運司銀踰年金人敗盟朝廷將大

七萬兩糴大麥二十萬斛

舉以植漕運有才略授直敷文閣京西河北路計度轉

運使植措畫有方廷議倚重繫年錄紹興三十一年冬十月甲辰直敷文閣荆湖

北路轉運副使李植並兼逐路招討司隨軍轉運副使應辦劉錡成閔軍錢糧乾道元年遷提

刑江西二年直寶文閣江南東路轉運使兼知建康軍

府兼本路安撫使主管行宮留守司事植上書極言防

江十策其略曰保荆襄之障以固本根審中軍所處以

俟大舉蒐選疆壯以重軍勢度地險阨以保居民避敵

所長擊其所短金人降者宜加賞勸皆直指事宜不為

浮泛疏上帝嘉其言以太府卿召赴闕有疾不克上道

遂以中奉大夫寶文潭相與往還講論言及國事必憂

形於色始終以和議為恨年七十有六卒有文集十卷

題曰臨淮集廬陵胡銓為之序諡忠襄子五人汝虞知

桃源縣汝士朝奉大夫知黃州汝工知昌化軍論曰李

植蚤著忠蓋為天子故人能與黃潛善秦檜為異閉門

不出待時而動斯亦知所向方者矣宋史本傳蘇過送李植秀才歸盱

盱詩濁流盡處見淮山水作青羅擁髻鬢頓覺山川無與並固知人物亦相關妙年宜作小坡客黼黻洗錦

重親方在白雲間瓢飲來同陋巷顏不為菹鱸起鄉思

隱詩窈窕幽篁帶薜蘿青春白日坐蹉跎試詢烏石江頭水寧有微波接汨羅

胡昉盱眙軍免解進士紹興三十一年冬十月與盱眙尉夏俊部八十四人夜攻泗州金守棄城遁輿地紀勝俊入城撫勞詔俊就知泗州以昉為右迪功郎充泗州司戶

參軍後知盱眙軍繫年錄隆興元年十二月乙丑張浚入

見力言金未可與和請帝幸建康以圖進兵帝乃手詔

王之望待命境上令昉等先往諭金帥以四州不可割

之意如必欲得四州則當追還使人罷和議二年二月

乙酉昉自宿州還初昉至金金人以失信執之帝聞昉

被執謂張浚曰和議不成天也自此事當歸一矣既而

布薩忠義以書進金主金主覽之曰行人何罪即遣還

續資治通鑑乾道二年守和州鑿千秋澗續資治通鑑淳熙

通鑑之望言歷陽含山縣有麻澧二湖灌溉民田為利甚溥

乾道二年守臣胡昉鑿千秋澗以設險澗既開通而二

湖之水始洩入江積十餘年澗水日洩灌溉之利遂廢

今欲於千秋置斗門以防湖水之洩遇大浸則啟之以

出外遇旱暵則用之以潄水俾二湖詳雜記五年官總漕

可資灌溉又不妨千秋澗之險從之

劉位招信橫山人靖康初詔天下勤王位素豪強為鄉

里所仗率數百人應募將行會淮上盜起部使者檄位

退保鄉井賊王鎮李公諤杜麻胡張遇等羣起剽掠位

連破之威聲大震號橫山劉家軍西北衣冠與細民多

依之建炎三年十一月乙巳朔知濠州孫逸聞金兵渡

淮即聲言往建康見杜充計事遂以州印付淮西兵馬

都監王宗望北盟會編而去充聞之即檄節制兵馬劉

位權知濠州丁卯杜充引親兵三千絕江而北奏言臣

以護王室時充有邪謀聲言往招信縣會位兵來援遂北行四年五月戊申濠州土豪王惟忠自韭山寨率眾歸位位以惟忠為左軍統領壬子金人既渡江淮東猶無警位領眾在橫山軍中惟飲博而已甲寅金人陷定遠縣山東盜張文孝挾節制淮南軍馬閻勅偕至招信位禦之文孝戰不勝與勅往濠州乙丑詔以淮南兩浙宣撫使司統制軍馬權知滁州劉位為滁濠州鎮撫使兼知滁州時滁州為張文孝所據而敵將孫興在濠州六月丁丑位兵克滁州文孝遁詰旦復擁眾至位出城迎敵逢眾數百以為己兵方指揮殺賊而所逢者賊兵

也急戰不得脫遂為所殺權知州事荀閱等上其狀初

高宗幸台州位募人田閒道奏事賜詔獎諭至是詔贈

武功大夫忠州防禦使乾隆志作建甯軍節度使建廟於滁紹興六

年四月壬戌名位廟曰剛烈繫年錄

劉綱字公舉少從父位禦金破賊屢立戰功建炎四年

三月以修武郎為武德郎閤門宣贊舍人六月位沒於

陣詔以綱知泗州起復滁濠鎮撫使九月庚子朔綱奏

言本軍闕食事屬危急詔建康府賜米二千斛仍毋得

渡江時綱已率所部自采石濟江屯於溧陽其徒之食

往往抄掠以自給壬寅劉光世奏綱以所部渡江赴行

在散在南北岸作過甲辰綱在建康論者喧言綱且反綱束身赴行在白明會呂頤浩亦乞綱自隸范宗尹奏稟號令唐室之衰不以他事祇是藩鎮跋扈爾旣而言者請遣綱還鎮設逗留不行則寘之典刑乃詔頤浩俟過防秋遣發自今諸鎮撫使毋得擅離本鎮綱又言世居泗州所領之眾類多土人今泗州隸趙立而令綱以所部歸濠滁則人各思歸勢必離散詔招信縣特割隸濠州初綱屯建康其下張憲等三百人爲變焚府東門之弔橋十月庚辰掠句容縣通直郎知縣事董萃率射

士民兵擊去之十一月丙寅金祝友出瓜步江沂流至馬家渡計置渡江時綱在溧陽友之舟爲綱所扼及岸不得登紹興元年五月丙午眞揚鎮撫使郭仲威將往九江從李成綱以所部屯建康之雨花臺仲威爲所扼不得進復還揚州謀據淮南以通劉豫劉光世遣前軍統制王德往擒之癸亥詔綱所部中軍牙兵等六千餘人並令神武中軍統制辛永宗遣將官統押赴行在用綱請也綱受命逾年卒不之鎮於是左軍統制王惟忠等以所部土人數千渡江北去綱所將者獨淮北數千人而已始綱旣不能渡江盜王才因據濠之橫澗山爲

寨縱兵剽掠殺權知滁州梅迪俊綱卽以權清流縣丞張格非代知滁州三年四月丙申韓世忠言浙東兵馬副鈐轄劉綱淮泗土人熟知地利乃命綱以所部聽世忠使喚五月己卯世忠請留淮南兵馬都監劉綱以五百人屯泗上而大軍悉還鎮江四年五月甲子詔以閤門宣贊舍人添差浙東兵馬都監劉綱充淮東兵馬鈐轄泗州駐劄十一月丙午朔詔武德郎閤門宣贊舍人淮南東路鈐轄通判泗州劉綱就差知泗州時泗州已爲金所據六年正月乙酉綱丁祖母憂乞解官承重州人共留之後五日詔綱免持服七月劉豫揭榜山東妄

言馮益遣人收買飛鴿因有不遜之語時綱知泗州得而上之七年冬十月戊戌僞齊遣兵犯泗州綱已起復武功大夫守州城率官軍拒退之尋詔綱領文州刺史初綱乞調滁州千夫修泗州城有旨從之言者以爲非是上謂宰執曰百姓誠不可勞但邊城利害至重趙鼎曰昨得旨已令優給錢米矣十二月綱奏王倫歸耗十年四月丙寅詔綱兼新應天府路馬步軍副管知宿州六月戊申綱行抵符離舊守景祥以城叛應天府路兵馬都監王存挺身南歸綱不能進乃改知泗州仍以虹縣隸之十一年八月丙寅命綱代劉光遠知揚州主管

淮東安撫使公事總領節制本路諸州水寨民兵十月
 丁卯通判揚州趙旼湯廣年等聞金兵至棄城保瓜洲
 鎮綱先以措置興化鎮水寨為詞而去十二年詔武功
 大夫榮州團練使知揚州劉綱提舉台州崇道觀以綱
 引疾有請也二十九年正月癸丑詔右武大夫和州防
 禦使新兩浙西路兵馬鈐轄劉綱為淮南西路馬步軍
 副總管權知廬州二月丁酉左武大夫和州防禦使知
 鼎州劉綱添差兩浙西路馬步軍副都總管臨安府駐
 劄六月甲戌詔給真俸十二月己卯資政殿學士知潭
 州魏良臣薦綱臨戎果敢禦眾嚴明詔樞密籍記姓名

時綱在廬州籍淮西之民得不餘萬奏言皆可用為精
 兵意謂淮南北相接民習戰故也旋兼洪州觀察使晉
 淮南西路副都總管攝帥逾年職事修舉三十年二月
 辛亥詔綱領武康軍承宣使知廬州六月己未復移知
 揚州七月戊寅綱卒上謂輔臣曰劉綱在淮西團結民
 社措置有方未到揚州聞已物故深可傷憫尋賜綱家
 銀帛二百匹兩繫年錄按紹興三十一年五月知濠
 州劉光時驅民入橫澗山十二月土豪
 劉鐸有眾數百在橫山一統志紹興間劉澤保聚
 于清平山金人不敢近其城壘當均係綱之族人
 明

李貞微時尙太祖姊曹國長公主生子文忠主病卒貞

轉側兵間歸太祖軍洪武元年封恩親侯駙馬都尉右
柱國曹國公貞孝友恭謹文忠率師討方國珍駐守嚴
州屢以征伐事出貞代掌留後事文忠克桐廬以所俘
卒送嚴州州城空虛俘卒謀叛去貞大饗其眾醉而縛
之以歸應天太祖嘉之授官如其子賜甲第西華門元
津橋之西帝數臨幸太子諸王時往起居親重無與比
晚歲尤折節謙抑嘗曰富貴而忘貧賤君子不爲也十
二年冬卒追贈隴西王諡恭獻

明史本傳

李文忠字思本小名保兒年十二而母死父貞攜之轉
側兵間瀕死者數矣踰二年乃謁太祖於滁州太祖見

保兒大喜撫以爲子令從己姓讀書穎敏如素習年十
九以舍人將親軍從援池州破天完軍驍勇冠諸將別
攻青陽石埭太平皆下之敗元院判阿魯灰於萬年街
復敗苗軍於於潛昌化進攻淳安夜襲洪元帥降其眾
千餘授帳前左副都指揮兼領元帥府事尋會鄧愈胡
大海之師取建德以爲嚴州府守之楊憲誣以不法帝
欲召還后曰嚴敵境也輕易將不宜且文忠素賢憲言
詎可信帝遂已苗帥楊完者以苗獠數萬水陸奄至文
忠將親兵破其陸軍取所馘首浮巨楫上水軍見之亦
遁完者復來犯與鄧愈擊却之進克浦江禁焚掠示恩

信義門鄭氏避兵山谷招之還以兵護之民大悅完者死其部將乞降撫之得三萬餘人與胡大海拔諸暨張士誠寇嚴州禦之東門使別將出小北門間道襲其後夾擊大破之踰月復來攻又破之大浪灘乘勝克分水士誠遣將據三溪復擊敗之斬陸元帥焚其壘士誠自是不敢窺嚴州進同簽行樞密院事胡大海得漢將李明道王漢二送文忠所釋而禮之使招建昌守將王溥溥降苗將蔣英劉震殺大海以金華叛文忠遣將擊走之親撫定其眾處州苗軍亦殺耿再成叛文忠遣將屯縉雲以圖之拜浙東行省左丞總制嚴衢信處諸全軍

續資治通鑑元至正二十七年吳滅金華田租得金華時軍食不給加府王崇顯請增民田租以足用民頗病之至是浙江平章李文忠以其事聞遂下令免所增之數又四月丁卯吳江浙行省平章李文忠言嘉興海甯海鹽沿海州縣皆邊防之所宜設兵鎮守王命文忠調兵以戍之吳兵十萬方急攻

諸全守將謝再興告急遣同簽胡德濟往援再興復請益兵文忠兵少無以應會太祖使邵榮討處州亂卒文忠乃揚言徐右丞邵平章將大軍刻日進吳軍聞之懼謀夜遁德濟與再興帥死士夜半開門突擊大破之諸全遂完明年再興叛降於吳以吳軍犯東陽文忠與胡深迎戰於義烏將千騎橫突其陣大敗之己用深策去諸全五十里別築一城以相倚角士誠遣司徒李伯昇

以十萬眾來攻不克踰年復以一十萬眾攻新城文忠帥朱亮祖等馳救去新城十里而軍德濟使人告賊勢盛宜少駐以俟大軍文忠曰昔謝元以兵八千破苻堅兵百萬兵在謀不在眾乃下令曰彼眾而驕我少而銳以銳遇驕必克之矣彼軍輜重山積此天以富汝曹也勉之會有白氣自東北來覆軍上占之曰必勝詰朝會戰天大霧晦冥文忠集諸將仰天誓曰國家之事在此一舉文忠不敢愛死以後三軍乃使元帥徐大興湯克明等將左軍嚴德王德等將右軍而自以中軍當敵衝會處州援兵亦至奮前搏擊霧稍開文忠橫槊引騎數十乘高馳下衝其中堅敵以精騎圍文忠數重文忠手所格殺甚眾縱騎馳突所向皆披靡大軍乘之城中兵亦鼓譟出敵大潰逐北數十里斬首數萬級溪水盡赤獲將校六百甲士三千鎧仗芻粟收數日不盡伯昇僅以身免捷聞太祖大喜召歸宴勞彌日賜御衣名馬遣歸鎮明年秋大軍伐吳令攻杭州以牽制之文忠令亮祖等克桐廬新城富陽遂攻餘杭守將謝五再興弟也諭之降許以不死五與再興子五人出降諸將請僇之文忠不可遂趨杭州守將潘元明亦降整軍入元明以女樂迎麾之去營於麗譙下令曰擅入民居者死一卒

借民釜斲以徇城中帖然得兵三萬糧二十萬就加榮祿大夫浙江行省平章事復姓李氏大軍征閩文忠別引軍屯浦城以逼之師還餘寇金子隆等聚眾剽掠文忠復討禽之遂定建延汀三州命軍中收養道上棄兒所全活無算洪武二年春以偏將軍從右副將軍常遇春出塞薄上都走元帝遇春卒命文忠代將其軍奉詔會大將軍徐達攻慶陽行次太原聞大同圍急謂左丞趙庸曰我等受命而來闔外之事苟利於國專之可也今大同甚急援之遂出雁門次馬邑敗元游兵禽平章劉帖木進至白楊店天雨雪已駐營文忠令移前五里

阻水自固元兵乘夜來劫文忠堅壁不動質明敵大至以二營委之殊死戰度敵疲乃出精兵左右擊大破之禽其將脫列伯俘斬萬餘人窮追至莽哥倉而還明年拜征虜左副將軍與大將軍分道北征以十萬人出野狐嶺至興和降其守將進兵察罕腦兒禽平章竹真次駱駝山走平章沙不丁次開平降平章上都罕等時元帝已崩太子愛猷識里達臘新立文忠謀知之兼程趨應昌元嗣君北走獲其適子買的立八刺暨后妃宮人諸王將相官屬數百人及宋元玉璽金寶十五玉冊二鎮圭大圭玉帶玉斧各一出精騎窮追至北慶州而還

道興州禽國公江文清等降三萬七千人至紅羅山又降楊思祖之眾萬六千餘人獻捷京師帝御奉天門受朝賀大封功臣文忠功最授開國輔運推誠宣力武臣特進榮祿大夫右柱國大都督府左都督封曹國公同知軍國事食祿三千石予世券四年秋傅友德等平蜀命文忠往撫循之築成都新城發軍戍諸郡要害乃還五年以宣力四方賜彤弓復以左副將軍由東道北征出居庸關趨和林至口溫元人遁進至臚胸河令部將韓政等守輜重而自師大軍人齎二十日糧疾馳至土刺河元太師蠻子哈刺章悉眾渡河列騎以待文忠引

軍薄之敵稍却至阿魯渾河敵來益眾文忠馬中流矢下馬持短兵鬪指揮李榮以所乘馬援文忠而自奪敵馬乘之文忠得馬益殊死戰遂破敵虜獲萬計追奔至稱海敵兵復大集文忠乃斂兵據險椎牛饗士縱所獲馬畜於野敵疑有伏稍稍引去文忠亦引還失故道至桑哥兒麻乏水渴甚禱於天所乘馬跑地泉涌出三軍皆給乃刑牲以祭遂還是役也兩軍勝負相當而宣甯侯曹良臣指揮使周顯常榮張耀俱戰死以故賞不行六年行北平山西邊敗敵於三角村七年遣部將分道出塞至三不刺川俘平章陳安禮至順甯楊門斬真珠

驢至白登禽太尉不花其秋帥師攻太甯高州克之斬宗王朵朵失里禽承旨百家奴追奔至羶帽山擊斬魯王獲其妃及司徒答海等進師豐州禽元故官十二人馬駝牛羊甚眾窮追至百千兒乃還是後屢出備邊十年命與韓國公李善長議軍國重事十二年洮州十八番族叛與西平侯沐英合兵討平之築城東籠山南川置洮州衛還言西安城中水鹹鹵不可飲請鑿池引龍首渠入城以便汲從之還掌中書省大都督府御史臺同議軍國大事督園丘工兼領國子監事文忠器量沈宏人莫測其際臨陣蹈厲風發遇大敵益壯頗好學問

常師事金華范祖幹胡翰通曉經義爲詩歌雄駿可觀初太祖定應天以軍興不給增民田租文忠請之得減額其釋兵家居恂恂若儒者帝雅愛重之家故多客嘗以客言勸帝少誅戮又諫帝征日本言宦者太盛非天子不近刑人之義以是積忤旨不免譴責十六年冬遂得疾帝親臨視使淮安侯華中護醫藥明年三月卒年四十六帝疑中毒之貶中爵放其家屬於建昌衛諸醫並妻子皆斬親爲文致祭追封岐陽王諡武靖配享太廟肖像功臣廟位皆第三墓在江甯鍾山之陰敕董倫撰碑父貞卒贈隴西王諡恭獻文忠三子長景隆次增

枝芳英皆帝賜名增枝初授勳衛擢前軍左都督芳英官至中都正留守景隆小字九江讀書通典故長身眉目疏秀顧盼偉然每朝會進止雍容甚都太祖數目屬之十九年襲爵屢出諫軍湖廣陝西河南市馬西番進掌左軍都督府事加太子太傅建文卽位景隆以肺腑見親任嘗被命執周王橚及燕兵起長興侯耿炳文討燕失利齊泰黃子澄等共薦景隆代炳文爲大將軍將兵五十萬北伐賜通天犀帶帝親爲推轂餞之江滸令一切便宜行事景隆貴公子不知兵惟自尊大諸宿將多怏怏不爲用景隆馳至德州會兵進營河間燕王聞

之喜語諸將曰李九江紈綺少年耳易與也遂命世子居守戒勿出戰而自引兵援永平直趨大甯景隆聞之進圍北平都督瞿能攻張掖門垂破景隆忌能功止之及燕師破大甯還軍擊景隆景隆屢大敗奔德州諸軍皆潰明年正月燕王攻大同景隆出紫荆關往救無功而還帝猶慮景隆權尙輕遣中使齎墨書賜黃鉞弓矢專征伐方渡江風雨舟壞賜物盡失乃更製以賜四月景隆大誓師於德州會武定侯郭英安陸侯吳傑等於真定合軍六十萬進營白溝河與燕軍連戰復大敗璽書斧鉞皆委棄走德州復走濟南斯役也王師死者數

十萬人南軍遂不支帝始詔景隆還黃子澄慚憤執景隆於朝班請誅之以謝天下燕師渡江帝徬徨甚方孝孺復請誅景隆帝皆不問使景隆及尙書茹常都督王佐如燕軍請和燕兵屯金川門景隆與谷王穗開門迎降燕王僭位授景隆奉天輔運推誠宣力武臣特進光祿大夫左柱國增歲祿千石朝廷有大事景隆猶以班首主議諸功臣皆不平永樂二年十二月周王發其建文時至邸受賂事刑部尙書鄭賜等亦劾景隆包藏禍心蓄養亡命謀爲不軌詔勿問已而成國公朱能吏部尙書蹇義與文武羣臣劾景隆及弟增枝逆謀有狀六

科給事中張信復劾之詔削勳號絕朝請以公歸第奉長公主祀亡何禮部尙書李至剛等復言景隆在家坐受闈人伏謁如君臣禮大不道增枝多立莊田蓄童僕無慮千百意叵測於是奪景隆爵並增枝及妻子數十人錮私第沒其財產景隆嘗絕食旬日不死至永樂末乃卒正統十三年始下詔令增枝等啟門自便弘治五年錄文忠後以景隆孫璿爲南京錦衣衛世襲指揮使卒子濂襲卒子性襲嘉靖十一年四月辛卯詔封性爲臨淮侯祿千石十三年閏二月乙巳卒無子復以濂弟沂紹封僉書南京軍府十五年十二月丙申卒子庭竹

嗣屢典軍府二十年提督操江佩平蠻將軍印鎮湖廣

卒淮安府志庭竹以臨淮侯充總兵官鎮淮安子言恭嗣言恭字惟寅守備

南京入督京營累加少保好學能詩工篆書國朝厲鶚攝山禱

詠白鹿泉詩澄泓浸山腹天影露半珪傳聞初開日雪

色飲伊尼誰知臨淮侯興與桑苎齊原注泉上有明李

言恭篆折節寒素著有日本考五卷青蓮閣集貝葉齋

集游燕集子宗城少以文學知名萬厯中倭犯朝鮮兵

部尙書石星主封貢薦宗城才授都督僉事充正使持

節往指揮楊方亨副之宗城至朝鮮金山倭來益眾道

路藉藉言且劫二使宗城恐變服逃歸而方亨渡海為

倭所辱宗城下獄論戍是時御史馬從聘因宗城事萬言言恭不當復督戎政不從萬

厯三十八年四月甲申以其子邦鎮襲侯四十年十二

月甲辰掌府軍前衛天啟二年卒子弘濟崇禎十二年

七月甲戌以臨淮侯遣代祭明亡爵絕明史本傳參通鑑等書 按貳

臣傳順治二年 大兵下江南有臨淮侯李祖述與趙之龍俱降

張德林從明高帝起累功親軍指揮使德林二子長崇

次貴建文時貴以鎮撫指揮使與靖難兵戰白溝河死

被旌而文皇即位按籍論罪以貴死遂戍其兄崇大同

衛洪熙時以兵籍徙宣城遂為宣城衛人國朝吳肅公張星傳

鄒魯洪武中以聰明正直舉授河內省志作河南誤縣主簿尋

降會稽典史耆民舉奏廉能遂升知縣既而廣甯衛鎮

撫趙興以公事至縣為人請求魯執法不從興遂誣奏逮至刑部事得直上嘉其有守特擢大理寺丞賜寶鈔

襲衣明一統志

王晏字士甯父成甫母葛氏通詩以人材舉由本邑訓導官洛陽典史廉直不隕穫於權勢有中貴過邑欲有徵求陵鑠吏民晏諭以理法不聽廉得其私裝將檢之乃歛謝以去擢滋陽知縣永樂二年遷刑部郎中執法平允尋調儀曹被命之江西督造海舟減費十二三太宗巡狩東宮監國當對稱旨召見輒賜大官酒饌陞陝西布政司參政有布政司嘗宴寮佐用聲伎為樂止之

不可乘間而出事聞連及凡在座者悉繫京師法曹俄

內旨特宥復任東宮召諭之曰我意汝無他為上陳之

耳晏在陝撫有惠政以秋糧後期左遷山西參議滿九

載始陞山東右參政嘗督開運河岸有梁山伯舊志暨山東運

河備覽並譌為梁山泊墓甃以巨石晏悉取以造梁莊諸閘共事

者有難色晏曰此非名賢事不經無補風教吾姑以紓

民力耳訖用之服官歷四朝五十餘年無侍妾嘗言酒

食財吾自保無惑難排遣者氣耳然折衷以理人皆服

之宣宗五年年七十四乞歸未幾卒子二長禮次善孫

佑巴陵丞有節操

王清太祖姊婿從太祖征陳友諒大戰鄱陽湖沒於陣
太祖還建康追贈武節將軍驍騎尉管軍上千戶封盱
眙縣子建忠臣祠於康山歲時致祭後追封清妻為太
原長公主清駙馬都尉子二致淵致澂俱以廕授指揮
僉事

戴德明初從太祖征伐以功累官至中書省參知政事
卒追封譙郡伯世襲指揮

周元太祖初數從征伐以功累官至鎮國將軍世襲校
尉同時駱從仕以薦舉官潮州知府有廉惠稱

蔣東昇七歲母失明齋戒祈禱異人授以方藥治之母

目復明及長好義輕財推產讓弟以善行旌異

井孚古州守將洪武三十年古州上婆洞蠻作亂吳得

與孚守城賊燒門急攻二人開門奮擊得中毒弩死孚

戰死贈孚正千戶子孫世襲

明史弁
魯傳

王文德洪武間為浮梁令正版籍以均力役覈田畝以

正稅賦興學校以敦孝弟民到於今稱之

省志引江
西通志

侯端永樂中授金山衛指揮同知十六年倭寇入犯端

巷戰被重傷復招散卒進戰焚賊船千餘艘

侯繼高字繩武世襲福建金山衛指揮同知升南澳副

總兵澳中祠宇城雉皆其創建舟師器械製造一新後

遷都督僉事

省志引福建通志

靳敏字時遜景泰二年進士歷官監察御史巡按陝西以風力著有土豪累世積惡敏微行訪之被囚水獄中其家婢陰啟門釋之曰妾亦受害者敏裂袂解肘章綬以迹授之曰持此叩直指之門則雪矣既按部悉發而

籍沒之

江南通志

陳道字德修天順八年進士官文選司主事成化五年調南京刑部游至郎中清謹奉法所掌司素號繁劇道訊鞫明審同僚有疑獄亦取正焉遂總諸司奏牘名益起十六年母憂去職服闋補武選擢知金華府金華繁

劇道至詢諸利病於父老及屬官之純謹者悉得其情以次釐革昕夕不懈郡俗獄訟牽引動至數百輩官斯土者多憚其纏繞累月不爲結斷民多係纍道勤於聽治有大獄往往以數語決之卽罷去有豪民手刃拒捕眾莫敢近執而斃之郡獄疏曠乃爲周垣出入由府門奸不得肆並垣有古梓頗扇妖祥道伐之會邁疾眾以崇爲疑道不爲止俄疾瘥他府有大獄不能決多歸之弘治元年以上考擢江西右參政湖東吏民多奸惡爲民害道稔其事捕數人坐以法遠近肅然進雲南右布政使再遷陝西左布政使八年以右副都御史巡撫河

南為政嚴簡疏言陳潁州衛縣懸隔盜賊所萃宜中設縣治又大名河南二府均受河害宜令滑濬諸縣出夫役以助修濬事多允行是時歲運京倉及邊餉每丁戶部領多至萬人勞費並劇道止令里正徵銀解赴其地糴穀而輸之民病祛而公事亦辦逋逃侵尅之弊皆絕所在藩邸多蓄游惰至矯令為虐疏請降勅禁治奉命偕欽使治河事竣賜銀幣召入為刑部侍郎再奉勅勘獄南京遷右都御史掌院事十四年授南京刑部尚書富商或以貨餌人藉官勢以虐取逋利道悉置不問雖得怨謗不為變十七年致仕卒贈太子少保賜祭葬道

居家嚴肅有法度子大章字明之成化二十年進士官刑部主事調職方司典試禮部升太僕寺卿以外艱歸卒大章長於吏治所在著稱兼工詩詞善畫墨菊工草

書以才技為當時所推道裔孫瑤圃事親以孝稱

朝邑國

人李嶠瑞彙陳月瀧太常蘭竹草蟲并引陳大章字明之月瀧其自號也世為泗州府臨人父南湖公道由進士官禮部尚書月瀧弘治中亦舉進士累官至太常卿博學能文章工書畫畫菊尤知名當時語云月瀧一幅菊倭國十兩金子與太常生同鄉里購其真蹟存者絕少偶得蘭竹草蟲攜入都門戊子五月二十八日與諸公集聖安寺為納涼之聚出與共觀諸公皆賞愛之因索為題子亦綴詩於後詩云太常工畫尤工菊倭國十金求一幅價高直北香山詩能辨不獨雞林日我與太常生同里絕少收藏在殘篋紙墨破碎此燈存寶愛心常勝珠玉柴桑風景偶不寫却寫幽蘭並叢竹湘浦移來滿谷香淇園占得干竿綠更看趨趨草間出游蜂穉

蝶如相逐著地飛憐粉翅輕穿花過覺黃鬚毒當時寶
應有陶成雲湖仙人姿絕俗筆落時奪天巧一見太
常心輒服太常生本貴公子起家不借尚書祿頗將文
字敵陰何還用丹青凌顧陸前明好手良不乏文唐沈
伏擅高躅後來更重董華亭今日月灑好誰篤圖繪方
聞事修纂精詳不數宣和錄我謂太常品不凡試請諸
公共推轂王式丹李蒼存屬題陳月灑太常蘭竹草
蟲圖詩疏竹崇蘭蝶夢閑曉烟欲散露光溥就中寫得
清寒意莫作丹青院體看吾鄉高士憶陶成畫品
同時並有名今日風流何處覓都梁山接汜光清

李紹賢字崇德正德十二年進士先世巢縣人六世祖
文隨東甌王湯武襄戰采石有功擢百夫長隸泗州衛
遂籍盱眙曾祖宣祖華父本世有隱德紹賢幼穎異不
羣凡兒及冠見大志負時名孝友豈弟稱於鄉族釋褐
授戶部主事部銀饜邊例有火耗羨餘曹郎咸利之紹

賢觀政浹旬悉籍付有司不苟取改授行人司行人齎
孝貞純皇后遺詔至徐州開讀徐之水次倉羣闖勢熏
赫以屬吏視州衛官偃蹇席班首紹賢立詔左從容令
撤閣席不與職官同禮羣闖惕服時武宗數微行畋游
無度十四年將巡兩畿山東祀神祈福甯王宸濠久蓄
異謀與近倖相結人情洶洶懼變叵測草莽伏戎江淮
歲大祲羣黎方困郡邑長百計科斂以待徵行疾苦哀
怨之聲囂然遍南服紹賢與修撰舒芬兵部郎中黃鞏
等先後連疏入諫帝怒命跪午門梏拳五日會金吾衛
都指揮僉事張英肉袒戟刃於胸以死諫帝愈恚三月

戊午命杖舒芬等百有七人於闕下是日風霾晝晦四月己卯舒芬行人李君墓誌銘作己卯明史武宗紀作戊寅杖黃鞏等三十九人

於闕下先後死者十一人紹賢死焉其僕殯之慶壽僧寺世宗卽位卹錄諭葬蔭一子如例祀鄉賢子公著遺

腹子公度

朱祥舉人成化中任青州推官擢知陳州勤明有爲仁慈撫下興學校捍水患稱一時賢守

蔡興盱眙人父歿負土築墳廬墓三年植木成林有鳩鳥營巢之異事聞旌其門大學士李東陽爲作傳明一統志

引南
織志

蔡璘成化中任滑縣知縣發奸摘伏奸豪斂迹民有鬻

女納官馬者捐俸贖之祀滑縣名宦祠

蔡維藩貢生弘治中任慶雲縣調東安縣勤於撫字甚得民心以憂歸居鄉有行誼著地理說痘疹方訓蒙諸

書子尊周任霍州州同著患立錄

蔣昞祖父四世同居正德八年秋淮水暴漲漂民居兄蔣時方病不及避昞抱兄緣杙逃生兄爲浪所激墜水

昞入水負兄赴岸力竭俱溺死越三日弟負兄尸泝流

而上事聞勅旌義士乾隆志 按明史孝義傳蔣昞昞人萬厯時旌孝未知卽昞否

柳應聘字達夫舉人嘉靖中任朔州知州時邊疆多事

力保危城裁抑宗藩作興學校以疾歸嘗修泗州志子
屋庠生亦以文學稱

西賢金山衛指揮使築江門獨樹等營堡軍伍嚴整子
甯字孟清襲職修建營房以居軍民積薪易銀以應公
需掌印十餘年獄無冤濫告許不與會推汀漳守備都
指揮僉事歷揚州等處備倭都指揮僉事致仕卒

盧璧字國賢號玉田盱眙人占籍應天嘉靖七年進士
二十九年任福建漳州府居官廉潔莅事嚴明承公私
允濫之後痛加省約尤好獎進孤寒崇尚行誼葺威惠
廟清侵沒祭祖以供費繕城隍廟及各祠宇政暇修郡

志親自編纂焉

福建通志

任陝西苑馬寺卿居官清介奏最

天下清官第一解組歸家徒四壁惟菽菊自娛著有菊
譜子入盱庠

常存仁盱眙人開平之裔嘉靖間句容縣訓導天性仁
厚篤愛士林舊有去思碑植道義門左

江甯府志

闕寬少充鄉兵有勇力嘉靖三十六年倭寇犯揚州由
天長劫掠至義井東山守兵皆潰署縣主簿朱昊領鄉
兵禦之爲寇所乘墜馬寬獨奮擊突陣翼主簿而歸事
平大吏旌獎

戚杰字翰川泗州人世居盱眙嘉靖乙丑進士知新蔡

縣擢吏部主事治理精明秉公正抑僥倖遷考功郎初聘花氏女未婚而瞽婦翁請易婚杰不可遂畢姻其行誼無愧古人云子伸字起綦崇禎戊辰進士授戶部主事權許墅關築二橋以便民人甚德之事竣有餘羨三千金上之於朝予告家居流寇破盱眙伸輸金犒士協力守禦泗城得不陷

馮世登字汝良泗州衛人歲貢生事寡母篤孝家貧教授以給甘旨博涉羣書爛古詩文官順德縣訓導權邑篆有循聲卒於官祀名宦祠邑鄉賢祠

馮應京字可大又字慕岡又作茂岡世登子少孤卽潛

心理學師事鄒南皋學益進萬曆二十年進士爲戶部主事督薊鎮軍儲以廉幹聞尋改兵部晉員外郎二十八年擢湖廣僉事分巡武昌漢陽黃州三府繩貪墨摧奸豪風采大著稅監陳奉恣橫巡撫支可大以下唯諾惟謹應京獨以法裁之奉指克萬端至伐塚毀屋剝孕婦溺嬰兒其年十二月有諸生妻被辱訴上官市民從者萬餘哭聲動地蠡涌入奉解諸司馳救乃免應京捕治其爪牙奉怒陽餉食而置金其中應京復暴之益慚恨明年正月置酒邀諸司以甲士千人自衛遂舉火箭焚民居羣擁奉門奉遣人擊之多死碎其尸擲諸途

可大噤不敢出聲應京獨抗疏列其九大罪奉亦誣奏
應京撓命陵勅使帝怒命貶雜職調邊方給事中田大
益御史李以唐等交章劾奉乞宥應京帝益怒除應京
名是時襄陽通判邸宅推官何棟如棗陽縣知縣王之
翰亦忤奉被劾詔宅之翰為民棟如遣逮俄以都給事
中楊應文論救遂并逮應京宅之翰三人頃之奉又誣
劾武昌同知卞孔時亦被逮緹騎抵武昌民知應京獲
重譴相率痛哭奉乃大書應京名列其罪榜之通衢士
民益憤聚眾萬人圍奉廨奉窘逃匿楚王府田大益傳疏論湖廣
稅監陳奉救僉事馮應京忤旨切責時武昌民以應京被逮羣聚鼓譟欲殺奉奉匿楚府以免大益因上言陛

下驅率狼虎飛而食人使天下之人剥膚吸髓重足纍息遂執其爪牙六人投之江

並傷緹騎詈可大助虐焚其府門可大不敢出奉潛遣
參隨三百人引兵追逐射殺數人傷者不可勝計日已
晡猶紛拏應京囚服坐檻車曉以大義乃稍稍解散奉
匿楚府逾月不敢出亟請還京大學士沈一貫因極言
奉罪請立代還言官亦爭以為請帝未許俄江西稅監
李道亦奏奉侵匿狀乃召還隸其事於承天守備杜茂
頃之東廠緹騎有死者帝愠甚手詔內閣欲究主謀一
貫言民心宜靜請亟遣重臣代可大拊循因以侍郎趙
可懷薦帝乃禡可大官令可懷馳往未至可大已遣兵

護奉行舟車相銜數里不絕可懷入境亦遣使護之奉
 得迤邐去應京之就逮也士民擁檻車號哭車不得行
 既去則家為位祀之三郡父老相率詣闕訴冤帝不省
 吏科都給事中郭如星刑科給事中陳維春更連章劾
 奉帝怒謫兩人邊方雜職繫應京等詔獄拷訊久之不
 釋應京乃於獄中著書昕夕不倦三十二年九月星變
 修省廷臣多請釋繫囚於是應京及宅棟如獲釋之翰
 先瘐死而孔時繫獄如故應京志操卓犖學求有用不
 事空言為淮西士人之冠出獄三年以上元之次日腹
 病輒死天啟初贈太常少卿諡恭節

明史本傳 次子霽居母

喪用古禮以哀毀卒

劉永澄練江集與馮茂岡書城外招提一晤請益之心政自無窮而

戶外之履滿矣倉遽告別懷抱鬱然悵恨如何尊教尋
 皇祖舊章以挽時弊真藥石之論間為相知中有識者
 道之無不歎服但草昧之世患無法中葉之後患無人
 今之人才如此雖欲舉之誰規誰隨徒付之長太息耳
 僕冗吏也於廟堂機務無所窺其萬一第從旁竊覩今
 日之風教人心大要揉直作曲挫剛為柔而已大老非
 調停不能免過小臣非軟美不能取容而當事者一味
 取圓熟巧妙之人以充任使專務摧折正氣使之不得
 少舒其尺寸風行草偃之機日變月化之勢極重而不
 可返牢固而不可破久矣人非金石節非松筠軒冕之
 榮在前褫斥之辱在後去此就彼忍辱自全何所不至
 而名教之凌夷紀綱之積敗又何關其胸臆哉先生正
 人也江湖戀關亦頗一動念否吾鄉士氣久衰二百年
 來與開國諸勳爭竹帛之動念者殊寥今日得先生一
 地靈不孤矣維風善俗迪啟後人如漢之李元禮郭林
 宗唐之陽諫議宋之程明道胡安定皆先生能事也先
 生豈無意乎敝年友潘文絳帳之地最邇仙都輒因郵
 筒以請中所欲語百不盡一惟先生惠教之幸甚又寄

馮茂岡書僕碌散曹無尺寸自表見惟日夜私祝聖
 明回照早脫高賢於縲繼而躋之大位以爲旋乾轉坤
 之助蓋不勝五內之惓惓矣所恨秩猥力綿叫闈無路
 當事二三大老又夙黻交識祁奚乘驛之見蓋難言之
 賢者在錮小人得輿不知後世董狐書法如何而生同
 其時具有良心如僕輩者尙戀冠組以爲榮坐塗炭而
 罔覺亦汗顏甚矣淫雨累月到處崩垣敗壁園扉景象
 悽愴可知此時非大有一見解大涵養者不能脫離苦惱
 之障想先生當有一段匡坐類皆嘗詔獄則今日先生
 時也本朝薛敬軒李空同之類陶成之地彼九棘三槐衣
 所憇之地乃正人君子甄鑄陶成之地彼九棘三槐衣
 紫拖金者二百年來不知幾許湮滅無聞之輩又不知
 幾許遺臭萬年之輩則槐棘之位未必不辱於縲繼而
 縲繼之中未必不榮於槐棘也且先生境地雖苦而心
 事則安居處雖幽而襟期則朗俯仰無愧衾影兩適何
 不樂之有彼蠅營狗苟背公違私者雖身居崇廡之上
 口享大烹之養而飲食有所不甘夢寐有所不怡僕甚
 苦其生趣之少也曹貞老行時遺書戒僕嘗宜通訊於
 馮茂老僕斯須未敢忘之以多病僻居未能乘便代致
 日者氣候鬱蒸深以先生之起居爲憂謹此專訊乞批

教爲慰僕愚戇無補且夕圖南掘侍何時言之神黯又
 寄馮茂岡書僕屢裁書奉唁而屢不得投蓋自奸書發
 後緹騎之戒嚴故也頃偶有狗馬之病邸報稀聞忽有
 傳先生出獄之耗者牀蓐間距躍不自勝先此代候小
 愈卽圖躬謁以罄肝膽不既又哭馮可大先生詩漢江
 江上祠君久此日看碑淚更頻三宥已憐垂死日百年
 猶作暫歸人書成羨里千絲短家本濠梁四壁貧何事
 貂璫氣頓盡知君遺節足理輪又與何玉現書馮茂老
 一代理人旦夕相劇必有所益又寄同年某書鄉中賢
 者惟馮茂岡于起菴居差近而書易聞不謂茂岡文倏
 以上元之次日病腹輒死使弟寸腸欲裂丁元薦靜
 之劉公墓碑萬麻中葉士砥柱江淮者吾友二人焉一
 爲觀察馮公可大鹿而折其角不勝中奇禍以死又寄
 直以氣吞宗五鹿而貧遺子淵之扼齋汨羅之志
 劉練江文若迺甘原憲之貧遺子淵之扼齋汨羅之志
 賦長沙之服盱眙京口而後並靜之三矣黃宗義明
 儒學案僉憲馮慕岡先生應京馮應京字可大號慕岡
 盱眙人也萬曆壬辰進士授戶部主事改兵部稅監陳
 奉播惡楚中朝議恐地方激變移先生故無鑛而每邑
 三郡先生下車約束邑令於學宮曰邑故無鑛而每邑

歲輸金四千餘緡豈天降地出乎吾以三尺從事矣於
 是邑令以無鑛移稅監稅雖怒而無以難也即走郎
 襄以避先生辛丑孟春三旬宴稅監陳奉兵舉砲思洩
 怒於先生百姓聚而噪之奉黨鉤其聚者殺傷百餘人
 先生疏奉不法九大罪奉亦疏阻撓國課惡語相加詔
 遂逮先生下鎮撫司獄三楚之民叩闕鳴冤哭聲震地
 上不為省先生在獄四年與同事司李何棟如華珏講
 學不輟甲辰始出卒於家先生師事鄒南皋其拘幽書
 草皆從憂患之際言其得力棟如字子極號天玉
 官至太僕寺卿亦講學於廣陵則先生之傳也

紀志邦字心齋貢生任沈邱訓導性至孝奉母之官嚴
 飭士習撰教民六義以裨吏治條陳救奢弭災諸議在
 官五載奉母歸撫孤姪分囊讓產以給之自居澹泊年
 踰八十舉鄉賓卒祀鄉賢

錢應龍字雲馳樂善好施講學修行縣治東北瀕淮萬

歷中淮水汎漲民居蕩析捐資築隄五十丈以障之舉
 飲賓祀鄉賢

徐安正德時人博學多技能尤長於算數著有算法三
 卷探本河洛錯綜律呂鈎躋探微能明隸首之奧今行
 於世

陳一典廩生學於舅氏馮應京著有文集弟庠生一清
 博學通古今于殿應京外孫少亦從應京學篤行攻苦
 有貞靜之操晚通邵子皇極之學

華志賢字淮村舉人世居虎頭城坐臥一室探索圖書
 經年不入城市或偕野人作止周知稼穡非力不食官

舞陽令守法急公無苛政歲除例省囹圄見桎梏者悲號殫鯨志賢亦泣下諭之曰爾輩豈無父母妻孥之思今欲縱爾暫回定省以正月中旬爲限爾來仍卽爾罪否則罪在我弗惜也各給糧糗而去屆期皆來歸解組後卒年九十子愷以恩貢官蘄州州判潔已愛民有家

法乾隆志

吳大章貢生歷汜水大足知縣有循聲以母老乞養歸

乾隆志

蔡景盛正統中以孝旌蔡芳鄧潔蔣元皆以孝旌趙信

少失母事父盡孝居家多善行乾隆志

馮應翰生員有至性叔世登卒於順德官舍應翰千里扶柩歸葬教孤弟應京成立爲名臣周佐增生有孝行舉鄉飲賓壽八十著有遺訓錄周邦瑞事親盡孝行己正直有古人風喬岳生員李惟賢廩生均事繼母以孝稱持身端正李九標生員善事父母動遵禮法親沒廬墓妻彭氏亦孝事舅姑孫日隆生員三歲喪父事母能色養閭里稱之宥涓劉崇孝蔣學顏沈一元弟一中王羸金陸德渾錢伸李朝楹馮宗祥皆割股療親疾學顏一元皆廩生錢三漢年十二割股療父病尤爲時所稱

乾隆志

蔡彥平正統四五年災荒輸粟千五百石於義倉濮榮
輸麥豆千一百石於義倉李記子輸粟五百石振濟姚
光裕萬曆四十七年大荒捐穀六百石振濟並被旌異

乾隆志

張其政馮堯禮楊宏業杜光春許成材趙之龍洪伸生
員趙玘好施王學禹捐穀振飢紀文賢歲飢振粥趙之
璋施棺藥葺橋梁皆以善行被旌李惟質捐金爲貧民
輸賦徐和捐修浮橋姚允登修義成壩陳錙修獅龍橋
辛安造舟立義渡還遺金贖鬻女尋倌撫孤姪與己子
均分資產趙師德謹事父衰疾兄失明孝友不怠彭永

齡三世同居養孀姊撫孤甥沈禮杜翰汪憲孫鉉均還
人遺金孫瓊生員周璟善事祖父母吉端魏河蔣東萊

劉國賓嘗陳免驛傳馬價疾苦邑人德之

乾隆志

許科增生周秉仁李一淇皆三十喪妻不再娶

鄭輔李大方陳職陳卜置田供祭贍族趙師賢並隱居

清修爲時所重

乾隆志

劉景著有農桑諸書趙儒著有性學源流篇易學卜筮

醫數等書

乾隆志

周咸亨天性孝友與子應華應禾應期皆年登八十孫
夢年亦七十五均舉鄉飲賓靳性王仲義皆百歲葉秉

清湯裕趙鑑馮應鼎林繁禮苗九思周士登苗繼堅楊
光大曹綱鄭信年九十善弈並耆年見重乾隆志

陳所學何其介並以繪事見稱周邦畿工於醫所至奏
效人士重之乾隆志

華岳入山樵薪易米養母遇人授筆一枝畫松入神黃
壇善畫竹曹日昭工山水人物汪寬善山水趙蘭善懷

素草書乾隆志

周行精天文易數占驗吳天挺善醫著有傷寒辨論及

幼科集要乾隆志

晏鸞錢芳生員錢寶張書顧鉞馬駿周至德劉斯溥洪

修紀文元盧亮馮世學高中元馮霑皆以詩文見稱於

時乾隆志

沈勛天性純篤事親孝尤好施與陸族卹鄰終身如一

日明萬厯元年巡按御史韓以善人旌其門乾隆志

姚允恭字玉岑貢生少師馮應京學有本源官霍山訓

導崇禎八年流寇陷霍山教諭長州龔元祥罵賊死允

恭夙與元祥友善至是亦罵賊被創未死哭斂其尸即

自縊適縣令至解之越日賊又至允恭大罵賊怒殺之

斷其骸焚其臂方賊未至時允恭猶草書論時事千餘

言呈當事事聞贈元祥助教允恭學錄祀忠義祠並鄉

賢祠

王養正字聖功泗州籍崇禎元年進士授海鹽知縣遭父喪服除起官秀水中大計補河南按察司照磨累遷南康知府計殲巨寇鄧毛溪熊高一方賴之福王時進副使分巡建昌南都既覆大兵下江西巡撫曠昭棄南昌走瑞州列城望風潰養正與布政夏萬亨知府王棫推官劉充浩等起兵拒守閱三日有客兵內應城破養正等被執械至南昌與萬亨等同死其妻張氏聞之絕粒九日卒妾謝守志鄉人集歌頌之篇爲成仁錄子贊育奔走數千里負骸歸葬廬墓三年終身縞素撫異

母弟教之成立贊育厚重端方世其家學著有易燈詩說商書解農書蘆瀨詩草孫鶚來著博山亭集 國朝乾隆中 賜養正諡烈愍

潘自得字行素號肖鵬崇禎十年進士兵部主事性純孝母病跪奉湯藥淡泊清靜不事干謁

宋聚奎庠生崇禎十年流寇侵掠聚奎練勇守禦賊至奮擊居民得全後賊大至眾寡不敵亡於陣長子之允亦殉李維楨見兄維藩被賊傷赴救不支被害妻仇氏與三子俱殉

王風仁字長人號體元其先淮陰人大父徙盱眙風仁

登崇禎十六年進士上書陳母朱氏撫孤苦節得旌表
嘗與同邑周永緒請豁代納馬價數千緡鄉里德之官
漢陽知縣流賊入楚上言於朝請以便宜從事許之甲
申左良玉兵潰亂風仁入其壘與抗禮爲陳說大義卒
無譁者民賴以安鼎革後隱居不出

國朝

周永緒字承之號繩武進士順治初官平樂府副使十
年李定國陷平樂殉難贈光祿寺卿廕一子祀鄉賢

乾隆志

楊宏祚字弼元號公永舉人工詩善眞草書居鄉謙厚

言動不苟

乾隆志

宋騰鯉字貞麟號尺木貢生由推官任靈寶知縣多惠
政邑人德之卒祀名宦爲諸生時與兄躍鯉齊名躍鯉
字馨馥歷任宿州松江蘇州訓導通史學所著書甚眾

乾隆志

蔡陞貢生順治間官雲南布政使司理間值吳逆反陞
脫身歸大軍從軍數年賊平歷署祿豐易門澂江縣事
任廣東都使司經歷卒於任

乾隆志

施端教字匪莪有文學尤喜集唐人成句爲詩切情指
事昭合渾成工若已造

其吳門懷古云上方金殿鬱岩
堯却憶吳王古市朝小院迴廊

春寂寂深簾飛絮畫寥寥千年城郭名空在百戰山河
血未消衲子不關塵世事月明夜夜自吹簫贈人云送
君卮酒不成歡竹裏行厨洗玉盤十載亂離知已淚百
年粗糲腐儒餐風塵荏苒音書絕桑梓彫零故舊殘客
裏聊爲河朔飲暫以貢生官宣城訓導遷范縣知縣入

爲東城兵馬司指揮在宣城時葺治學宮任范縣九載

蠲虛糧二千餘石民賴以蘇居京師日與名人游士酬

唱喜刊刻書籍所在殺青積累如牆壁所著有讀史漢

翹諸書卒葬盱眙山

戚珥字莞爾又字緩耳

四庫全書提要別集存目謂字後升誤

泗州籍世

居邑城祖杰父伸俱甲科部曹珥以優貢授知縣善詩

天資穎岸兒時嬉笑皆成韻語試輒冠軍著有笑門詩

集同時名下士如王士正宋犖周亮工毛奇齡陳維崧

汪楫杜濬紀映鐘吳嘉紀徐秉義李天馥輩咸爲文字

交尤與山陽吳珊胡天放靳星璧同邑施端教李枝芄

善唱酬無虛日江甯黃周星酷愛珥有奇才之目謂以

終賈之少年挾陸潘之異藻其婦翁王鼎子逸老亦善

詩珥以清雄邁往之思得王切劘故學益邃而詩益工

幼嗜長吉體既乃力追正始拔王孟錢劉之幟靖逆侯

張鵬舉提督閩省軍務招珥游聞至卽患暴下遄歸卒

於途壻林任爲梓遺集二十五卷子五慎惕愔恬怡慎

字緘子貢生最知名亦工詩

李枝芄字義士貢生泗州籍世居盱眙工詩家有小園在其宅之西中闢坐花堂賓客甚盛選有西園同調集子二嶠瑞嶸瑞嶠瑞字蒼存又字簣齋以拔貢中康熙乙酉副榜入國學與一時名下士游嘗問業於新城王士正士正序其詩文云縱橫有奇氣由教習議敘知縣歷官唐縣知縣安州知州著有後圃編年等集嘗繪猿驚鶴怨圖以見志聞鄭方坤撰詩人小傳詳其事鄭方坤國朝名家詩鈔小傳李嶠瑞字蒼存盱眙人為諸生盛有文名前後督學使者皆以國士相待用茂才貢入成均時海內名士翕集都下而先生攘臂其間珠光照乘劍氣衝霄飛竿擘笈座無車公不樂固輦轂之美談亦簪裾之韻事也都梁近接泗濠倉荒特甚人士率白首一經抱殘守缺無能以風雅自振先生獨挺然秀出自

其為童子時即知聲病既冠築講堂於洪澤之陂借二三羣從讀書其中鏗訇陶冶而自成一家言年事漸增出而與當世之名卿大夫游錯綜其議論乃益浩然有得凡所見山水崖谷之奇鳥獸蟲魚草木之華實與夫身世間可喜可愕可歌可泣之參差百變一切寓之於詩而傾困倒廩出之淡遠風華不名一格非彼描頭畫角蚓竅蠅聲所可同日語也既久困場屋則以教習期滿循例為唐邑宰所謂敲扑誼囂犯其慮牒訴控愆裝其懷者因作鶴怨猿驚圖以見志又謂昌黎文起八家之衰而享年曾不得下壽太息於文人無命而悲不自勝朱幾竟卒殆神先告之歟先生與先君子同官為僚雅相交好贈答倡和之章一歲必兩三見披閱篇目覺爾日情事宛然可想門堂雖無太傅同邑戚珥時方以形象亦足使二鍾入門便大感慟矣

詩重天下嶠瑞與齊名世稱戚李嶸瑞字霄鄰又字蕭初拔貢生康熙三十五年授睢甯教諭甫抵任見學舍榛墟慨然以修復自任捐千金成之又設義塾寅義田

百畝闢敦閣堂朔望課士講授弗倦分韻賦詩士習丕變在官二年餘以母憂去瀕行復出金二百爲善後計服闋任宿遷訓導著有歸來橐行世

周克綏廩生置義田贍族捐金濟荒法監生廣施樸元標監生捐置義田一區同生員龍標捐建奎星樓胡世瓚同子守謙從孫銑文捐銀一千三百重建王家集積

慶橋好爲善舉

乾隆志

林修侯官人衛籍拔貢順治中官昌黎知縣華州知州濬治方山河詳免協濟潼關牛車差徭民皆德之

李致知字靜御以宿學教授生徒成名者百餘人由貢

生任贛榆訓導性鯁直不徇俗教士有方諸生爲立碑

紀其事著有古人宜觀

乾隆志

李沛霖字岱雲貢生留心理學與弟兆恆子魯堂殫心纂述著書甚眾

柳墀字柳村性磊落崇氣節年四十餘始爲秦端崖學使激賞充選貢著有逸人詩草喬貽聃字可村貢生工詞賦真率自任與鄉人羅恕每試輒高等恕舉人性嚴峭遇無禮者必直責之人皆尊憚貽聃好諧謔人多樂就之喜獨行山谿間或偃息古寺竟日與人飲有不可者卽默趨去弟貽鈞亦舉人治古文與副貢孫志芳爲

鄰志芳亦績學嘗手鈔十三經均以文行相敦勉貽聃所居曰可村貽鈞題其村曰篔村地與柳村近柳墀因移居焉志芳亦至名其村曰新村而恕居永興鄉相距十餘里其地陵樹參差曰畫村五人因署以爲號鄉人稱之爲五村云

伊蒿室文集

江宏字永錫職監生由歙移籍居邑之澗溪鎮好義樂施拯災患繕梁衢皆力任焉子國緯刑部員外郎建邑南清水壩澗溪西濟壩行人利涉助振郵貧施棺掩骼善不勝舉國紳中書舍人好善如父兄建鎮南隄壩置救火器造義渡船尤盡心力國綸恩貢生有學行能文

章國儀職貢生皆以孝友義行稱孫淇貢生友愛二弟嘗出粟振飢捐金修學校潤通政司經歷文行才略並重於時源附貢縣丞嘗剖股療父病宏弟立德亦以剖

股療親傳

乾隆志

潘延禳貢生傾資施濟敦睦親族廷敬增生篤學優行填貢生能文皆慷慨嗜義捐建文昌閣里中吉凶事不能舉者靡不解囊濟之代以善稱瀚監生授州判幼孤事母撫二弟人稱孝友並工詩文有著述

乾隆志

方大耀桑士修皆康熙二十八年鄉飲大賓以義行重鄉里方景聖貢生能詩文益庠生冠祖宏祖庠生皆樂

利濟長厚傳家桑植附監生建亭施茶馥貢生捐造土
沛集河渡船給工食以濟人捐穀施櫛世濟其美

乾隆志

張辰字天樞生員祖邦正父中輪世振災荒康熙四十
三年山東河南淮徐等處大飢流民轉徙過盱者道殣
相望辰出米三千餘石振粥百日存活數萬人卒年九
十五有五子皆能繼其志又李旭字儀昭捐銀二千餘
兩代貧人完雍正累年逋賦修橋焚券善行甚多壽八
十八喬璧生員路榮慶姚檻陸士顥戴度昭汪蜚英李
公甫艾仲學徐生鄞巢縣訓導唐永年六安州訓導皆
以義行重鄉里士顥捐置清平山義塚長約二里檻捐

陡澗學田一區生員鄞永年請豁除代納無爲州馬價
二千餘兩入皆德之陳理德訓導王風雍王鴻王鼎瑞
周夢泰生員馮聖時吳義先萬永生並有善行以大耄
著稱張問明王贊育貢生高丙王湜陳文愷萬言喬一
輿錢烜喬人正龔震並工詩文有著述

乾隆志

傅輪增生鄒廷材葉國士皆以孝稱輪少孤事母謹篤
廷材母年九十四廷材亦七十六母卒抱母尸一慟而
絕國士父爲豪家所窘縊死國士訟於官爲賄所抑不
得伸投井死姚煦字融三廩生性純孝父病嘗糞周穀
字修六生員善事繼母推產給弟姪朱開泰生員兄弟

四人累世同居友愛無間農民張景隆撫育孤姪如所
生汪倬生員親睦宗族鄉里推重喬一貫生員喬一昂
呂自成陳帝言鄭錫侯葉經鄧飛玉李德煥路滄臨均
割股療親童年割股者孫中裕

乾隆志

毛藻字侯園博學工制藝中乾隆辛卯舉人辛丑會試
卷已入選因兩主司擬元不相下遂不第由是絕意進
取晚年選上元教諭袁枚選其詩入詩話謂其詩得味
外味時人莫之許也鄧嶰筠制府未第時嘗受業於門
鄧貴求其詩刊之板皆無存惟客山堂時文四卷行世
唐振字鷺飛一字雪牀高東璧字璞巖並奇才早逝程

庚長字青崖張兆麒字古香四人皆生員工詩張湛鴻
嘗選其詩入詩塵

姚黃字瘦生南昌籍世居邑之瑞巖工詩有草莽文章
一片秋句爲世傳誦同時龔震字詠耕一字峙崖號蔚
林有春從游子吟中度身在慈親夢裏行之句其他傳
作甚多與山陽吳進清河王永熙唱和天長陳孝廉人
杰常稱之劉長發字遐瞻一字雨亭大興籍以祖官泗
州遂家邑城邑人王效成之外舅也亦以詩名時人以
擬戚珥王鼎子云

秦杓字斗庵以事謫戍烏魯木齊將軍某極愛之收諸

幕下會赦歸以軍功爲全椒營把總初杓自塞外歸兼攜淮上吳某如皋范某兩宦旅櫬各返其家相國松筠適赴伊犁知之高其義及相國督兩江擢杓至鳳陽守備松江游擊奇兵營參將屢護鹽梟嘉慶十八年教匪構逆邑人有被誣者上官將加兵杓與泗州營都司艾鳳祥具牒力辨事得解

王銘字治堂號省齋監生世居丹徒之順江洲家貧棄儒習賈於盱眙自以不能讀書爲憾故課子弟讀亟嚴他人子弟之能讀者亟愛之嘗客吳門途遇一童子挈書囊行試以所持書應口誦如流與之行數里不覺也

每歲秋必倡同人醵金置絮襖以施冬無衣者嘉慶己巳冬有淮船載數十人自北岸渡中流冰合越日南岸人遙見之欲救無術銘乃使人剖竹傅小舟底推行冰上達船所南岸數十健夫繫長繩往還推曳渡者獲濟泗州學正白尙質有文紀其事卒年八十七妻徐治家儉肅設塾師饌必手自爲之不假僕婢乾隆丙午歲大飢道殣相望徐乃煮糜粥佯爲買婢日招饑女飽食之語人曰人多吾不能徧及夫人苟有可以得食誰鬻女者吾周其至急焉可耳今王氏多以科第顯說者謂爲厚德之報

傅登魁字杏村廩生家貧篤學嘗手鈔經傳通考玉海諸書能悉記其要旨設館於雲山張氏課讀率四更起嚴冬不輟故成就者甚多江光杰談鶴齡王效成皆其弟子

鄭逢亮字月湖舉人性真率無矯飾事繼母孝績學工文老而彌篤官高郵州學正年八十餘卒於任

高瞻字望亭附貢生以經術教授爲鄉里所重楊殿邦汪云任皆其弟子卒年八十六

戴開文字韞山少穎異年十五以默經入邑庠弱冠游金陵從顧椿年游肄業鍾山書院每一藝出土林傳誦

嘉慶辛酉以拔貢入都館姚文僖公宅文僖故研精宋理以濂洛關閩之學相敦勉開文益自刻厲丙子領順天鄉薦由官學教習選金壇教諭教士以敦名節崇經術爲本知名士多就質焉八年以病歸創修家廟敬宗睦族一中於禮病痊補原缺十四年秋卒於官平生精於三禮嘗訓人曰近人研經之書雖純駁不同皆有裨益惟毛西河四書改錯不可寓目可知其所守矣有韞山制藝二卷行世

楊殿邦字翰屏號疊雲泗州籍祖居邑城父果亭江南松江營參將有助績殿邦生而明慧工書畫嫻騎射慷

慨有大志年三十猶未遇嘉慶辛酉以拔貢朝考二等
選蕪湖教諭俸滿保舉知縣中癸酉順天鄉試舉人甲
戌成進士改庶吉士授編修丙子充順天鄉試同考官
戊寅充河南正考官己卯充廣西副考官授雲南學政
任滿擢監察御史直言敢諫彈劾不避權貴道光五年
奏陳南河積弊十條六年八月奏風聞吉林官兵在途
不法奉 旨派耆英前往查辦七年晉給事中九月奏
安徽鳳陽定遠等處私梟充斥霸占口岸滋擾地方鳳
陽之溪河小谿定遠之三河集盱眙之明光集爲回民
販私口岸有裏外口之分互爭界限聚眾械鬪非販私

侵灌網引卽劫盜爲害閭閻並將著名要犯住址開單
進呈得 旨嘉獎京察一等授廣東南韶連道護暹羅
國貢使入京甫返任猺民趙金隴亂作連州排猺一時
蠢動偕知府汪忠增相機勦撫不數月猺匪平擢貴州
按察使賞戴花翎十七年擢山西布政使忌者劾以衰
眊調太僕寺少卿大考轉詹事府詹事兼順天府尹庚
子試差列第一充山東正考官得榜首于如川時論翕
然晉內閣學士兼禮部侍郎二十二年署倉場總督兼
戶部侍郎二十四年授漕運總督二十八年奏擒獲洋
盜解赴蘇州審辦究出首夥逸犯多名得 旨著李星

沅等嚴飭水師將弁緝捕咸豐三年粵匪犯揚州奉命
赴瓜揚防堵疏稱瓜儀兵單請催調水陸各兵以勦爲
堵未幾揚州陷聖吏議罷職留營辦理勸捐團防賞道
銜九年卒於軍卹贈太僕寺卿銜戊申泗有水患殿邦
嘗出數千金振饑捐廉籌賓興公車等費置義田贍族
著有菜香小圃詩集心太平居文集奏議若干卷子鴻
弼江蘇候補知府以善書名

吳淮字簪園號席波世居三界市以拔貢四庫館謄錄
議敘選桃源縣教諭俸滿擢福建知縣歷任南靖甯德
等縣所至案無留牘百廢具舉調霞浦以父憂去職服

闕母老遂終養焉家貧無以供甘旨游幕自給著有經
義考四卷制藝四卷子棨楷棨庠生以文行稱於鄉里
楷字端夫號次山童時塾師授以陸機文賦限一刻背
誦不遺一字弱冠後以拔貢入武英殿分校大清會

典己卯中順天舉人會典成議敘得知縣選授廣西宜
山以廉惠稱前令歿於任虧帑數千金楷代償之大府
嘉其義調懷集懷集多山蛟水發幾沒城縣署水深丈
餘楷悉提獄囚共居一危樓斷炊累日水退發倉振民
飢不足捐廉益之民賴以安十八年調桂林桂林爲粵
西首邑差役繁民健訟楷晝接賓客夜決事無留牘二

自明縣志卷九
十三年以卓異引見回任充甲辰鄉試同考官署鬱林
州知州踰年擢百色同知署泗城府旋回百色任時粵
西土匪萌孽天保馬令爲賊所戕臬使張熙宇督兵駐
潯州檄楷會辦楷日率練兵四出搜捕獲首犯臬示之
餘解散二十七年十月以勞卒於任喪甫歸而粵匪亂
起榮子炳經字德甫嗣楷後咸豐十年由廩生官江蘇
知縣同治四年署奉賢奉賢漕務殷繁積弊叢生炳經
嚴禁包攬令花戶自行投櫃完納諸弊一清縣有金匯
橋爲劇鎮多賭場鹽梟私販藉爲逋逃藪炳經廉得窩
賭者姓名乘夜緝獲嚴懲之遠邇惕息折獄明允益書

院膏火增孤貧口糧善政極多卒祀奉賢名宦祠

吳淳字茗園恩貢淮族弟少有才思鳳陽萬辰臣定遠
邵賓門時稱名宿文酒之會分題刻燭咸歛手推服焉
晚年病風痺臥榻蕭然不廢吟詠著有覆瓿集雜體詩
二卷紅梅書屋賦鈔一卷

吳洄字聖基號北山淮族弟家貧訓蒙養煢常不繼然
性和易治家有法年八十有四卒妻程氏有賢德子檢
棠棠自有傳檢字玉書幼出爲叔父後家貧習賈洄好
施與檢常積餘貲佐賙貧乏又於郊外購荒山數十畝
爲義塚地咸豐初居親喪廬墓盡禮丙辰歲大旱檢出

穀數千石助辦撫卹存活甚多踰年粵匪破邑治檢挈家避亂阜甯之海灘親族往依者數十人亂平重修文廟建魁星亭檢捐田五十畝供亭中燈油費生平好刻勸善書散給鄉里晚居滌每靜坐焚香誦內典以自娛夜有偷兒入室家人執之詢知爲良家子慰遣之終不言其姓氏檢子炳麒字祥伯咸豐初從叔父棠禦滌賊平棚匪有功同治元年以山東縣丞留清淮勦賊二月賊犯清江浦炳麒與都司陳國瑞擊却之敘功以知縣用十二月又隨國瑞赴蘭郟勦辦沂兗等處賊巢克復中村敘功以知州用二年隨國瑞赴蒙城助勦苗逆連

戰絕其甬道苗逆平敘功以直隸州歸部銓選光緒十年選四川忠州知州將赴任時海疆多事炳麒條陳時務 詔發往福建交將軍差遣而炳麒遽卒於武昌

楊萬選字青浦歲貢生素行篤實與廩生王兆棠友善兆棠病篤託以遺孤萬選任之爲經紀其家嫁其二女課其子如己子時論稱之

王蔭槐字子和號味蘭嘉慶癸酉丹徒舉人以父銘賈於盱眙遂移籍焉王氏之入盱眙以道光六年始蔭槐篤內行母徐病目睫腫下垂閉明醫以薄刃去其膜蔭槐輒自焯其掌以分痛生平學業邃於詩年弱冠卽以

詩名噪江左阮元江浙詩存符葆森正雅集皆著錄王
豫羣雅集選刻尤多時有江左三王之目謂豫與蔭槐
及王效成也效成與蔭槐同里開故詩又謂之盱眙二
王云蔭槐既以詩學重儕偶江陰夏翼朝稱其詩云意
有所得目空古人擬諸少陵何庸多讓武進李兆洛亦
謂其智識器量足以瞭然於古今升降之大事物蕃變
之細卓然可信今而傳後會稽王衍梅於廣西得其詩
拍案叫絕郵贈五律八章推挹不遺餘力天長程虞卿
稱其學有本原不徒以詩鳴者道光癸巳江督陶文毅
公巡河至龜山作詩數十章和者百餘人蔭槐和作尤

爲文毅所傾倒自鄉舉後七上春官不第丙戌大挑教
職請終養服闋選授貴池不就家有偶園在第一山麓
藏書數萬卷沈酣其中杜門不出又嘗爲輿地之學凡
山川阨塞水道曲折與夫郡國之沿革遷徙靡不旁稽
博考證其訛舛而得所折衷晚年目失明而作詩尤富
時於偶園中之紫藤花館分題鬪韻來遊者多當世知
名士生平重義節喜獎掖後進有以緩急告者赴之若
避水火邑有孫某應武童試以未銷原籍爲廩保所持
蔭槐調護之事得解孫由是入武庠邑有大政如修考
棚建書院築障淮隄立榷流所當事者必就諮焉蔭槐

未嘗以私干謁著有蟻廬詩鈔十卷行世從子錫麟字石生少從蔭槐學詩熟於蕭選以舉人謄錄分發甘肅知縣未赴任卒著有駢體詩詞

印兆金字薛裳歲貢生家貧好爲詩杜門篤學無間寒暑有所得輒隨筆記之著有老藤軒詩文集客山隨筆都梁偶記樸言簿編

汪云任字孟棠先世有隱德父景福字介夫廩貢生置田贍族云任以進士任廣東三水知縣移番禺辦理華洋交涉事力持大體擢廣西歸順州攝思恩府撫土司有體移江西贛州府贛界粵東素喜械鬪巨案疊出云

任捕渠魁寘諸法一郡肅然創設義倉凶札有備以父憂去職服闋授蘇州知府兼護蘇松太道擢山東督糧道督漕稱最內擢通政司參議簡授陝西按察使權陝西布政使復以繼母憂去服闋入都卒

俞舜欽字珊樵亦字古漁舉人世居蔣壩鎮以實錄館謄錄議敘授鉛山知縣丁憂服闋改選華容擢道州復權湘潭所至有循聲奉差赴鄂適李沅發亂作鄂省大吏奏留辦軍務沅發就獲舜欽解囚入見奏對稱

旨授乾州同知咸豐元年擢漢陽知府署鹽法道二年粵逆破長沙武昌戒嚴軍書旁午舜欽每日乘小舟赴

督轅襄理軍務制府倚若左右手寇事急將遣眷屬歸舟直昂署無百金之蓄同官某飲之乃行家人留老僕朱融裹餼破衲中偽爲行乞者以覘之三年寇逼城舜欽激巡勇以忠義親率巡城城陷朝服懷印投井死賜世襲雲騎尉祀昭忠祠

孫凌霄字芸樞附貢生精醫術橐筆游京師館某公家嘉慶十八年教匪變某公入衛家人搶攘甚賴凌霄以安事平某公益厚遇之

江光杰字鍾祥舉人好讀書盛暑必冠服所居樓輒數月不下與人交樸訥寡言善圍碁同時吳渠亦善弈

宋士聰字作謀庠生工詩王效成嘗兄事之伊蒿室集多贈作謀作丹徒王豫曾選其詩入羣雅集同時又有王永沂諸生亦工詩著有樂山詩鈔

王效成字子頤號雪腴幼讀書卽留心當世之務弱冠以辭賦受知於學使然非所好也性狷疾不能與世合居母喪廬墓三年不接人事其學務究極天人之故陰陽百彙之變內返之身心而推之倫物庶政覬以挽季俗而救敝世嘗言古之學者首重乎志志非徒心之所之謂也立之一時謂之意注之一事謂之念要之終身謂之志不終身不可言志也人心之動不之乎正則之

乎邪怠而自放將敗度之是憂並草木愚芒之不若志
烏可不定哉孟子曰志者氣之帥也其志經百撓而不
移其氣乃窮衰老而不餒勢位當之失其尊金玉當之
隱其耀疏水帶索環堵之室久處而却其困其蓄也至
微而其充也至剛至大上哲之所以聖孝子之所以格
忠忱義憤之所以就昆弟之愛朋友之交急禍難而共
貧賤之所以篤閭巷之女貞婦節且烈之所以靡悔一
念之矢而蹈之白首莫非區區之志爲之又言志於學
者必自讀書始書也者古今之梯渡也古之時庠塾教
修師友導責野秀錯起耳目之所周接日浸淫於禮義

而猶必勤資乎編籍自就傅以至垂白不可一息去也
晚時道愈漓而書日消百家雜作鱗比而鼃嘈使業者
神爲之眩昔史遷有言學者載籍極博猶考信於六藝
洵乎要哉效成生乾嘉間心傷夫禮教之衰也作禮論
其略曰天地爲虛器而生人爲散數交通流轉於其間
者二有形則貨財而無形則禮節禮節所以維持夫貨
財也天地祇此生物人不知惜之則耗散者益不足積
者益有餘而貧富之勢懸絕先王知其然也於是制爲
交際宴會昏姻喪祭之禮各稱其家而爲之所用恆視
其所有而又凶荒殺禮山澤異禮通時與地以酌劑之

目録卷九
故古民無僭踰之罪而資產得以常充論者深原之以爲陶育之具淺者則曰是等威之辨也若夫禮不能整一而儉則可以成遵儉固禮之本也先王之制牲牢玉帛之陳几席章服之具鐘鼓笙管之奏未嘗不務從其厚矣然而瓦尊也明水也大饗腥也冠緇衣也疏布之用而蒲越藁鞞之設也觀其所尚則其微意可知矣雖然禮樂者人情之著也斯人一日不絕卽禮樂一日不亡古之匏土等音廢矣而今未嘗無樂也古之喪昏祭宴異矣而今未嘗無禮也獨奈何士大夫動作自恣導亂愚氓之耳目僭越亡等生資坐銷雖有恭儉之君宏

毅之主欲求禮樂之效於一朝不可復得又云程吏以賢不肖爲進退無資格之限清白盈廷陰邪斂迹舉宮室衣服飲食器用婢僕一切而立之限家守儀型人知自愛此之謂廉恥興而等威辨等威辨而風俗清風俗清而財用裕財用裕而人心淳人心淳而刑罰省其易解讀周禮威戒奴禍諸篇見諸文集者皆體用兼該有裨人心風俗武進李兆洛山陽魯一同敘其詩文傾倒倍至駢體文澤於經訓惜不傳詩餘希心樂笑精潤可歌工醫不泥古方而應手輒效著難經釋亦不傳惟伊蒿室文集六卷詩集二卷軒霞詞一卷行世卒年五十

餘

華德風一名浴沂庠生居潘村教授以孝友稱兄某不善治生產鬻豕耗其貲父怒將責之弗敢歸德風以修金付兄歸償價又嘗賣已田代兄償宿逋鄉人至今稱之

沈大年字介眉少孤貧以孝聞嘗葬戚族之無力者十餘喪嫁孤女二復周其困乏精畫理與邑人金達齊名年登大耋

戴漢翔字鐵夫開文子舉人大挑選太和教諭咸豐初粵逆北竄太和捻匪蠡起漢翔協縣令督辦團防樓城

固守境賴以安大府奇其才將大用之漢翔不樂就署霍邱訓導陞潁州府教授嗣與大府有隙以年邁被劾歸

談鶴齡字晉巖舉人性孝友父病篤鶴齡以身禱及歿哀毀成疾幾不起諱日哭奠終身如一日居平動必以禮中年喪偶遂不娶晚年舉先世遺產及己所刱置者悉畀弟以舌耕自給鄉人稱之與王效成交最契

楊保字厚村拔貢性伉爽道光甲午春邑人倡修考棚保董其事其後修書院籌經費尤多贊助平生精醫術加減古方輒應手效卒年六十餘著有池南小草詩集

吳棠字仲宣號棣華舉人以大挑官南河知縣時南河屬吏尙奔競棠攜一僕賃居僧樓不事干謁踰年署邳州州同攝碭山知縣任事一月清積案百數十起補桃源知縣時豐口未塞棠督民築長隄禦湖漲購風車洩積潦勘災散振奔走於烈日中民閱其勞爲流淚邑有淮濱書院棠爲籌經費擇主講者立課程暇每篝燈從一僮爲肄業生剖晰經義文教振起道光三十年調清河清河爲南北要衝差役滋繁棠至禁胥吏苛派緝賭博嚴治盜賊年餘政稱最咸豐二年冬調署邳州歲荒盜熾棠率壯丁按名指獲置諸法設局倡卹收養棄嬰

三年復任清河粵寇突踞江甯鎮揚繼陷旁郡震懾賊具舟運河將北竄棠獨爲檄約廬鳳潁滁泗淮徐海八屬齊心殺賊並爲急檄謂滿蒙勁旅十萬統帥二十人分道南下飭沿河郵驛繕備車舟偵探絡驛張諭城市南及邵伯鎮賊謀返報懼而止人心大固江北得練勇禦寇自棠始也是時回空糧艘皆阻泊清淮水手萬計棠慮滋亂稟河督楊以增資遣並募練丁設左右二營朝夕訓練軍民胥恃以安四年春丁母憂去大府奏請奪情治喪百日以墨經視事揚州收復後回籍終制六年秋棚匪起奉皖撫檄會辦盱定滁來四屬鄉團棚匪

平累保以道員留江蘇補用署徐州府知府十年正月宿永捻首李大喜糾眾東下棠急牒河督請爲備時督轅夜宴聞者不敢白二月朔清河失守三月檄棠署淮海道五月署淮徐海道幫辦田營軍務兼理糧臺徐州逼近賊氛軍書旁午棠練兵籌餉刻無甯晷泗盱避賊流民多就食徐州棠悉留養十一年授淮徐海道秋勦賊黑山寨旋奉署理漕督之命兼江甯布政使棠以道員授是職異數也時宿永捻匪竄擾海沐棠星夜馳赴駐節清江浦時井里蕭條瘡痍滿目僦民房爲公署招流亡簡軍實檄各路官軍會勦築磚圩爲守禦計拔陳

國瑞於偏裨同治元年二月五日逆捻李成率眾來犯棠立圩門督親軍燃巨礮擊賊時客兵駐浦者有劉營王營而都統德楞額騎兵三千素精銳方賊撲圩諸營皆潰德營跽伏孫家莊不敢縱擊惟國瑞一軍與賊鏖戰自辰至申賊東竄陷阜甯掠東坎回據桃源之眾與鎮棠檄國瑞轄親兵配以礮船躡賊後距眾與十餘里背水結營連戰數日聞出奇兵奪賊輜重賊懼遁棠乃創築清河縣城修繕公廨疏請汰河工冗員設淮揚鎮改河防兵爲操防撥湖灘田濟餉移建崇實書院於運河北岸增膏火課士修文廟置祭器督民築圩寨堅壁

清野故賊再至皆不入境二年授漕運總督三年調江蘇巡撫四年署兩廣總督皆未赴任仍留清江防堵五年調浙閩總督蓋棠之簡在帝心自清河始官轍最久民情之愛戴亦清河最深云六年命赴廣東查辦事件調四川總督川省疆宇遼廓民俗殷繁弊端叢集棠至絕饋獻裁州縣節禮省城故有錦江華陽兩書院增拓之又增設尊經書院課古學刻經史數十種籌倉儲禁私鑄清鹽政裁冗兵凡養民恤士之政知無不舉八年兼署成都將軍捐廉萬兩建少城書院增旗兵馬餉十三年疏劾奸人李光昭獻木植助工之僞上是

其言立予殛斥工亦旋止海內偉之光緒二年引疾歸抵里九日歿遺疏入上軫悼賜葬祭如例子謚勤惠政績宣付史館廕一子員外郎欽賜舉人祀清河及本籍專祠生平與人言呐呐如不能出口及決大疑定大計當機立斷洞中窾要好施與創家廟增祭田立義學贍族卹鄰終身不倦好藏書所至悉以自隨著有讀詩一得一卷望三益齋詩文集四卷

張喜麟歲貢倡捐施棺子湛鴻字曉村拔貢性伉爽嘗游於京師無所遇以親老歸養閉門教授著有壽椿閣詩塵歿後始以例選黟縣教諭

王錫周字硯樵監生以縣丞分發浙江歷錢塘仁和三山陰任兼攝山陰縣事以廉惠稱歷平湖湯溪樂清知縣道光二十一年補樂清未赴任時海氛大起定海鎮甯相繼陷全浙震動撫軍病省垣驚擾錫周議赴江口先撫敗軍約束歸伍以資防守並於江岸海塘辦沙團防夷鯨竄入出示平糶糶禁擄掠以安民心濬城濠廣儲蓄堅壁清野撫軍從其策自辛丑八月至壬寅九月凡年餘省垣卒以固後任蘭溪獲鄰境盜十餘人例得敘擢錫周訊明卽分解鄰邑不居功人或異之錫周曰盜死於法公也吾忍以爲利乎咸豐三年以父憂去職後三年卒錫周官浙三十年明於聽斷人不敢干以私故所至有聲

汪根敬字小孟云任子以廩生官河南泌陽知縣有能聲補鎮平禁屠棺不葬舊俗以改廣勸種樹邑人利之調祥符城被水圍首先搶堵獲安知許州勤政愛民以厚風俗爲先務城垣學宮書院次第繕修增七先生六夫子邵文莊祠以時致祭勸鑿井三萬有奇以備旱道光二十三年中牟河溢振活難民數萬署歸德府重修試院擢守彰德密訪地方積弊如私造閤室等十四事嚴禁之振粥散襖以撫貧民盱眙舊有安樂橋舊有石

隄年久傾圯根敬捐廉重修今所謂小汪公隄也守彰
德甫兩月卒於官祀許州名宦

蔡天祿字石渠江蘇山陽籍世居蔣家壩隸河營由行
伍累擢參將署河中營副將屢著勞勩道光二十五年
洪湖水異漲新義河直壩沖成雙溝形若龍鬚土石雜
下悉隨溜去中存草埂一道寬不及丈弁兵莫能駐足
天祿堅立其上誓與隄爲存亡夜半見一人踏浪而過
天明有農夫來彷彿與前見相似曰何不用蘆席公異
其言亟命取席裹土填築隄賴以存咸豐三年粵寇踞
揚州天祿奉檄督辦三河團練時賊氛熾甚三河南之

觀音寺土匪潛匿謀襲蔣壩應揚賊天祿偵知率鄉兵
百餘夜渡急擊之擒其渠復於三河東北一帶平隄增
築壁壘八年賊首陳玉成驅眾十萬撲三河時兵團僅
千人天祿從容部署急風暴雨中相持數十日審知黃
衣者爲賊首擊殲三人賊始退其後髮捻雜至悉隨機
堵禦賊中有言長江好過蔡家溝難過謂三河也十一
年格洪阿駐兵寶積山部下殺之以叛天祿偕官軍剿
捕五日而難平積勞得眩疾同治二年卒年七十六漕
督吳棠請於 朝詔照軍營立功後病故例議卹在立
功處所建專祠

沈旌善字餘軒以州判陞河南知縣歷新野鞏汜水中
牟桐柏內鄉西華知縣所至有聲其在鞏修老撻坡行
理稱德汜水有疑獄百餘年未結旌善決之中牟河溢
旌善多方拯卹存活難民十餘萬其他縣政績皆稱是
當其時豫撫鄂公謂旌善治績爲中州最以積勞卒於
西華任著有奇孝徵詩錄南浦吟詩集弟樂善字叔堅
廩生工古文沈潛篤學不畏強禦粵寇陷邑治樂善不
爲屈賊舍之而去

秦茂林字翰卿號竹人以舉人官河南知縣咸豐三年
粵賊擾豫省城無守備藩司出庫金數萬募土民守陴
茂林守東門五月九日賊數十萬薄城礮碎城譙守益
固賊退論城守功最是年權商城時土匪起光黃間茂
林捕斬賊首李喜林等邑賴以安五年補武安時武安
里甲不清重爲民累先是戶各占各甲差各催各村久
而奸民詭名別村漏糧他戶胥吏因緣爲奸至一村占
數里之甲一差催數村之糧糧差謂之滾頭率以殷實
花戶爲之終歲奔走賠累傾家茂林爲之按村分甲按
甲立差復舊制百餘年積弊以革邑人爲之立祠河內
李文清公棠階爲樹碑記紀其事七年移洛陽洛南北
沙人强悍素抗糧茂林至適捻賊犯境卽率勇力禦賊

無所掠民德之悉完納如例九年補葉縣葉地瘠民貧
苦亳賊擾茂林修城浚濠城廂南北築兩寨爲犄角倡
行堅壁清野法共立四十餘寨賊遂不入境同治元年
再任洛陽洛陽故設軍需車馬局歲糜十餘萬緡取於
民茂林徹其局每兵差過境悉心支應事皆辦三年四
月移安陽四年三任洛陽六年四月卒於官同治十三
年祀洛陽名宦祠茂林邃於史學尤工詩著有敦良齋
稿

張承慶字善夫泗州籍拔貢學有本原立身清介精三
禮學官巢縣訓導升安慶教授在任未一年卒郡人士

悼惜之

宋德揚字溥齋居邑東之二十里岡工書畫間爲詩以
自娛有牧笛數聲芳草徑炊煙幾縷夕陽天之句爲人
傳誦卒年八十七

傅桐字梧生號味琴工詞賦屢不得志於有司棄而出
游入杭州將軍幕北出山海關抵盛京其生平崑奇磊
落無所洩一於詩發之著有梧生詩鈔駢體文

傅紹曾字仲魯幼嗜學學使試恆以解經列優等充道
光丁酉拔貢咸豐九年避粵匪於他所篋中以經史自
隨著盱眙備志同治丁卯大吏修安徽通志徵彙郡縣

知縣方家藩聘紹曾主其事紹曾乃出橐本益以近事
上之省局歷任蒙城甯國教諭著有春秋通義四卷

周濬副貢官泰州州同咸豐八年揚州失守殉難奏聞
予世職

張毓林拔貢官溧水知縣調練擊賊臨陣捐軀事聞予
世職同治志

高明志字得庵廣東從九品未赴省咸豐九年粵逆陷
邑治明志持一劍出擊賊遇害妻朱氏與第三子投水
死大吏上其事 賜雲騎尉世職世襲恩騎尉

李叔廉字星泉廩生家貧好學精星卜之術咸豐初登
第一山仰觀天象云滁泗之間將有兵劫卒如其言

王吉孟監生有至性父母年老臥疾數載吉孟左右承
志家貧典衣物奉親無倦色眾推其孝同治志

華燮臣精於醫服其方者輒愈嘗注有醫學心畬又顧
廣紀亦善醫診脈知人生死嘗見稱於蘇州葉天士庠
生吳天挺亦以善醫名

布衣江柵生員楊主義職員李載彭俱善書生員鄭蘭
潘以芳張寶倪琨俱善草書金遶字逸山善畫山水潘
凱元周蕙馨皆其弟子

金運昌字錦亭家邑之河梢橋幼值喪亂育於郭寶昌

之母曹氏遂從郭姓隸寶昌卓勝營爲前鋒所向力戰同治三年皖省肅清運昌功多授守備嗣追逆首張總愚於信陽解雉河之圍復有張耳寨之捷於是以游擊統卓勝前營六年移軍援陝獲勝晉參將 賞勇號冬克復綏德州城七年春勦賊直隸屢勝超擢總兵 賞換清字勇號時寶昌禦賊受傷 詔以運昌權統其軍會任張各逆竄直隸運昌戰於吳橋南皮再挫賊鋒禽賊首任柱餘眾潰散復於甯津收降張大福股匪直東肅清 詔以提督簡放運昌乃疏請復金氏八年甘督左宗棠調運昌防綏德所經北山皆回匪蹂躪之地計

程千餘里人煙斷絕士卒裹糧束馬側足而前甫抵綏德時湘軍已進勦金積堡而石灣一軍屢爲賊困意在梗我糧道運昌兼程馳赴力扼花馬池一帶糧道賴以疏通十一月 詔運昌進軍馳抵靈川再進至王洪寨禽逆回金標蘇阿渾斬之遂至吳忠堡扼後路仍駐花定陝回陳林禹彥錄等十三營並土回號稱十餘萬咸倚馬化澇爲聲援每出隊眾十倍我軍運昌孤立其間無日不戰且分兵護運道九年正月賊氛愈熾餉道阻塞軍中殺馬爲糧回逆決渠水灌我營運昌立水中激厲將士築隄迎戰於一日間破回寨二十餘座軍乃復

振九月會湘軍攻金積堡運昌腰中礮督戰不少退遂
患咯血諸軍合圍久陳林自縛降運昌建議西林河川
回眾宜撫之以安反側強壯編籍老稚就糧宗棠從之
十一月馬化澂勢窮出降金積堡平 賞穿黃馬褂移
軍纏金勒平烏拉特旗界回匪 賞給頭品頂戴移駐
黃甫川包頭一帶邊圉敕靜光緒二年宗棠奏調運昌
出關三年四月抵烏魯木齊時湘軍進攻南八城金順
駐瑪納斯自巴里坤至烏垣七百里賊蹤無定為害行
旅分營巡緝道路稱便八月署烏魯木齊提督四年兼
護都統六年八月授烏魯木齊提督伊犁未復哈薩克

游匪及白彥虎餘黨竄擾大河沿運昌以六營扼精河
屢有禽斬餘孽乃不得逞關外自兵燹後民生蕭條運
昌捐廉繕城垣疏溝渠修橋驛興農桑復協振直東諸
省凡盱邑之修復文廟試院縣署義倉暨賓興諸義舉
運昌均捐助多金無少吝八年九年兵事解嚴奏撤所
部軍陸續入關遣散歸農既因傷發咯血不止亟請解
任十一年得 俞旨歸抵壽春妾王氏馬氏張氏先
後仰藥絕粒以殉事聞 詔以運昌生平戰績宣付史
館立傳並入祀陝西金積堡安徽臨淮卓勝軍昭忠祠
其妾王氏馬氏張氏照例旌表

李長樂字漢春世居半塔集父瑤業農咸豐六年歲荒
斗米錢二千瑤低其值以貸里中有賴以存活者長樂
幼失學七歲卽喜挾彈追飛逐走里許外輒中瑤痛戒
之弗聽也前直隸提督陳金綬號知人率師過邑境止
其宅甚奇之曰是兒曷不肄武年二十入魯港水師充
勇目定海鎮李德麟之率師東駛下駐瓜揚也長樂從
而東同治元年粵寇圖上海上海急江蘇巡撫李鴻章
督師赴援長樂以外委從隸參將郭松林麾下充先鋒
官長樂之入淮軍以是始松林之克柘林奉賢南匯川
沙金山青浦嘉定各城堡解北新涇四江口之圍擊退

虹橋大股賊長樂皆與焉累保以都司補用充營官二
年五月復隨松林進剿江陰無錫大股賊毀賊壘百餘
座追殺八十餘里抵江陰城長樂腿傷矛軍稍卻賊氛
亦甚惡時長樂部下三百人咸願死戰長樂曰吾觀賊
隊辰出氣銳厲不可犯過午卽渙必其酋倦入息而故
爲游兵以懾我也翌申請戮力次日賊復出諸軍未動
長樂獨以三百人往乘之戰良久過午雷雨交作雲合
若暝長樂戰益力賊卻入城長樂陰躡之亦入城易幟
城大亂諸軍合乘之克江陰城松林以首功上得 旨
擢參將旋以部勇失伍褫職留營三年二月與克宜興

荆溪縣城起復以游擊用四月攻常州未克總統令於軍曰吾鼓三而不進者斬先時僨軍者亦斬令畢夷兵攻城南敗卻賊乘之長樂乃以田雞大砲轟其西南隅崩時中軍方一鼓長樂曰時不可失急乘之登諸軍畢登克之松林復以首功上擢副將南攻長興東攻湖州西攻廣德均克之擢總兵其後二年粵賊餘黨擾福建復隨松林赴援克漳州雲霄漳浦詔安各城加提督銜既凱旋乃以總兵統忠樸各營隨剿捻匪其明年改所部爲武毅前軍仍受松林節制會任柱賴文光敗於青州柱南死贛榆文光復北竄蹙於大軍返而東長樂邀

擊於壽光之杞城鎮逐奔及膠州之鄭家寨小南溝又北追之青州東蹙之壽光南北洋河及巨瀾河間禽殺無算遂南渡六塘河至於寶應文光終不得渡運河而西被禽於揚州之灣頭是時同治六年十二月也東捻平 詔賜黃馬褂七年二月復從松林北援 畿輔擊西捻張總愚進自景州阜城戰安平馬軍不利長樂以步軍大敗之追之於饒陽深州從旁襲破其團陳又敗之晉州饒陽境賊南竄河南尋復北要之濬滑大創賊於大伾賊益北至東昌渡運而東遂循運而北長樂從松林先賊至天津敗賊楊柳青賊乃復南松林既與潘

鼎新等濬滄洲捷地壩減河築垣減河北限賊北竄而東昌南至壽張北至臨清皆築垣張秋亦濬運河引黃水限賊南賊由是困長樂要敗之陵臨邑間遂從松林自陵臨邑亦築垣濬溝踰馬頰河至德州屬之運河賊益困然皆死黨難敵長樂夜襲之商河李家坊禽總愚子與諸將夾擊於濱州之李子鎮長樂深入破其圍陳數十疾追復敗諸商河之于家坪沙河總愚創焉 詔以提督總兵存記轉戰德平商河平原高唐間從松林與劉銘傳劉松山張曜宋慶等大合圍蹙賊荏平殲其醜類總愚自沈徒駭以死西捻平 賜博奇巴圖魯號

既凱撤駐防山東統武毅全軍復移防湖北漢陽襄陽九年移師入潼關復移防直隸鄭家口未幾回襄時郭松林任湖北提督松林去而長樂代其位焉前後署湖北提督者再十年授湖北提督光緒五年調湖南提督六年海上設兵備俄 詔詢李鴻章淮軍扼津沽宜有威望素著宿將如李長樂者統之方資倚任時松林方任直隸提督未幾松林死 詔授長樂直隸提督統武毅全軍古北口練軍防蘆臺扼大沽北塘門戶凡十年以操防積勞卒於任 上震悼予諡勤勇生平戰績宣付史館立傳原籍及立功省分建立專祠 賜祭葬如

例長樂二十從軍所向皆捷嘗以不讀書為恥既專闢折節下文士亦頗能通曉史事與人交以廉讓自處濟人之急千金無吝色喜乘馬塞外良馬至從數騎日行六十里以為常嘗言乘馬心氣相應通於道術少陵詠馬諸詩尙未能狀乘馬之妙卒年五十二朝論惜之妾王氏仰藥以殉被旌如例

流寓

宋

張大甯字嘉父山陽人登元豐八年第治春秋學政和間為司勳郎流寓盱眙蘇軾張耒皆與友善每過盱眙

多為詩賦贈之

蘇軾送張嘉父長官詩都城昔傾蓋駿

今三會合每進不少留豫章既可識瑚連誰當收微官有民社妙割無雞牛歸來我益敬器博用自周百年子初筵我已迫旅酬但當寄苦語高節貫白頭又過泗上喜見張嘉父詩壁間冰玉照淮明筆下波瀾老欲平直得金巖如許妙不知形謀幾多名空翠娛人意自還明窗一榻共秋間會知名利不到處把清觴屬此山張耒南山賦贈張嘉父南山巖巖兮其下有見之於握珠刻意魯叟之古經不習世儒之臆書我頃見之於宛邱貌秀哲而眉疏別去忽兮幾時面蒼瘠而垂鬚愛德器之老成資攻琢於璠璣問所與之為誰亦黃僑之仙癯禁入馬之超驚同芻豆於羣鴛時慷慨而長明恥賤工之附輿我行世之多艱三年困兮江湖幸天恩之放還過都梁兮躊躇奉兩月之周旋越長江之馳驅屢飲我於山間出翩躚之兩姝舟師告子以當行具檣楫於斯須歲方春而寒驕犯冰雪於野墟雲漫漫兮垂天風飄飄兮切膚穉翳於宿莽妍柳秀於羣枯汎羽觴之清冷聊覽物以為娛思佳人兮天末望莫見兮愁子又贈張嘉父詩浮舟大江里三千歸掃先壟清淮壩

杜門古寺厭岑寂夢寐清穎如家山汝陰昔謬稱刺史
 自愧何術蘇痾瘵平生為吏甘賤拙敢作孟賊傷民田
 未憂懷甄擊之去乃欲築室買一廛簞瓢三畝易辦耳
 寄聲父老不汝干長淮清冬龍蜃蟄放舟出郭天宇寬
 浮梁橫前颯可纜金塔卻立儼莫攀鬣張幼好此奇服
 白璧刻佩鳴玦環抱持微學不忍棄清明竹林遭削刪
 三年江湖友魑魅一日寶府觀璠瑤漸消鄙吝心自喜
 追計存歿涕亦潸尋山把酒豈易得客路霰雪衣裘單
 塵埃可洗憂可豁待君一酌玻璃泉又戲贈張嘉父
 詩鐵鎖沈江誰敢干塔中古佛澹無言歲窮故里何時
 到舟泊危亭盡日間博士蠶鹽稀把酒腐儒冰
 萬慣衝寒籃輿未怯浮梁險興發猶能走馬鞍

龔開字聖子號翠巖景定間為兩淮制置司監當官圖繪

寶嘗與陸秀夫同居廣陵幕府及世已改往來故京家

益貧故人賓客候問日至立則沮洳坐無几席一子名

浚每俛伏榻上就背按紙作唐馬圖桑海遺錄開博學好古

負才能尙意氣而甚邃於經術間為詩文皆清勁古雅

遊戲翰墨為山水人物尤卓絕不凡平生長髯及腹行

走如飛王鏊姑蘇志家近龜山或自稱龜城叟方回謝玉豹圖詩

呂伯宗東萊先生之後伯宗官盱眙安撫卒於任子孫

遂占籍於招信裔孫安洪武初膺薦辟後嗣益蕃衍

周體乾濂溪先生七世孫為制置使裨將避地招信因

家焉

明

林庭蘭洪武初知縣黃醅天順間知縣子孫並籍盱眙

後嗣多聞人

戴任字陽水徽州人博學工詩古文邑人馮應京延修
邑志遂占籍焉

黃周星字九煙湘潭人本周姓撫養於上元黃氏遂從

黃姓崇禎十三年進士除戶科掌印給事中不就國變

後易姓名曰黃人字略似僑寓盱眙與戚理交最洽嘗

選唐詩快三集一曰驚天一曰泣鬼一曰移人布衣素

冠寒暑不易狀類狂易年七十自撰墓誌作解脫吟十

二章縱飲大醉自沈於湖州南潯河以死

國朝

李三益鳳陽拔貢官衡陽思恩知縣卒於官子孫來盱

家士沛集

楊廷欽武進貢生官泗州教諭卒於官家舊縣子大鴻

孫蕙有文學

義烈按盱眙採訪忠義入奏三次茲編所錄僅據同

郵無從核實至年月之先後事蹟之詳略疎漏舛錯均所難免閱者諒之

李連登盱眙把總姜萬全澗溪汎于藻元明光汎周采

芹銅城汎杜連魁舊縣汎汪元盛外委顧宮山從九齊倍

員職楊承業員王經員宋燮元從九何國楨候補楊敦元

從九品楊永懷從九傅慶全職員咸豐十年辛懋功咸豐九年

殉難傅棠以團練功由附生保至縣丞六年請卹於培根

于台系志真 卷九 人物

寡不敵與妻 張杓 生員與妻 顧對山 顧問山 朱茂
李氏同殉 李氏同殉

時 顧學山 顧散山 顧仲山 顧春生 顧厚生

顧瑞生 顧乾生 潘志鏤 周秉燦 周學儼

周學傅 李上章 韓大昌 田萬如 沈學寬 劉

鶴亭 王有貴 施萬和 施得功 胡大慶 吳佩

亭 蔣開志 於國光 程之暎 程相聚 潘登杰

潘登儒 袁大如 袁得榮 楊春林 劉秉金

劉長庚 程舜齡 程良相 蔣調 楊長健 楊長

任 王銘 楊朝信 朱璋 朱廣才 朱廣恩 朱

暉垣 朱瑤 朱廣霖 支萬珍 朱增銘 辛沂

辛善傳 傅賓年 蔣如慶 傅德榮 邢宗高 辛

上林 張啟元 胡壽山 桑吉泰 朱玉林 胡榮

昇 祁兆麟 胡尙渠 江秉鈺 朱林 程應隆

程應旃 陳莊 包萬全 張佩蓮 胡萬春 楊尙

年 阮定和 劉永富 劉永昌 劉業本 劉業祥

楊懋林 萬秀全 吳樓 吳增墉 儒童 張德恕 宋

德衡 周坦如 李昀 蔣經生 徐桂芳 董大昌

李永庚 胡大受 周學倫 招永壽 於培忠

葛長盈 田儒 湯義珍 祖貫均 馬純寬 李長

庚 鄭起高 耿永發 耿在宏 金在興 金在玉

王育英 郭錦成 崔永林 張調元 吳培 吳

六生 程初調 朱廣祺文童 朱茗 丁若伊以上三人均於五月

殉張桂蟾武童五月二十六日率弟桂林藝祖糾村人禦賊兄弟三人同時被執縛於門樹磔而死

張桂林 張藝祖 趙廷獻 趙廷揚 趙萬如 蔣

廬子以上四人五月二十七日禦賊死於難 印雲書醫士九年五月二十七日賊至同母殉難

李成雙 趙景魁 鄔萬昌 王九 邱懷德九年五月遇賊

殉李志田 趙宏英妻李氏同時遇害 樊有儒 喬子衍 張

鳳城 李貴昌 潘文淦妻馬氏同遇賊投水死 王錫經 岳位

榮與妻王氏遇賊投水死 王印林 王恆春 王永春 張疑泰

陳玉祥 趙永 郭順安與妻趙氏遇賊殉難 李卓云 王萬

年 李萬年 姚重瑛 姚重球 姚履新 姚成仕

姚魁仕 姚長泰 胡萬林與妻張氏遇賊殉難 項義文 劉

榮章 馮學盛 陳忠妻余氏 戴忠揚妻余氏 余和 余陞

余恆 胡建均與妻湯氏遇賊殉難 鄒聯璧 鄒學郊 蔣永

來 石長 石長保 劉錦魁 劉長順 郭蘭亭

郭萬鍾 楊殿華 賀萬寶 蔣應朋妻王氏 毛貴城妻席

氏 毛順清 蔣長禮 張大本 張立成 趙萬年

張洪勳 裘雙全 張玉龍 李其同 劉大春 劉

大林 劉三林 沈兆咸 沈學元 耿萬林 耿萬

邦 錢如山 錢如海 劉大玉 何天衢 何萬全

何萬邦 何萬林 何萬方 闕啟元 闕文祥

闕文榜 闕昌林 闕昌萬 張懷志 張懷亮 張

意貴 朱萬春 朱萬林 朱兆年 朱兆榮 蔣萬

林 蔣萬和 蔣長元 蔣長聯 何萬福 顧秀山

楊慶華 鄒錦賢 鄒錦珩 李永熙 孟錫恩

朱兆林 張永林 田藻賢 田繼賢 葛錫紳 田

慶賢 田鎮基 田大賓 曾映庚 咸豐十一年與母梁氏同日殉難

侍杭 周大本 與妻邵氏一子同日殉難 周大佑 嚴恭 僧 曹熾

曹炤 曹佳 邱湧泉 曾映元 曾映九 曹坡

程金榜 附貢生候選訓導同治元年罵賊遇害 汪從謙 從九品咸豐九年遇賊死

鄧兆榮 咸豐九年遇 王守全 咸豐九年八月十九日全

臂罵 李大煥 都司殺 王敏秀 咸豐八年賊陷 周運元 咸豐

六年禦 鄒麗東 從九品咸豐九年賊 祁杰 貢生咸豐九年賊

賊殉難 鄒麗東 從九品咸豐九年賊 鞠晏春 從九品

覆其首 炙死 鞠采東 按察司照磨咸豐九年賊 鞠晏春 從九品

鞠淮源 鞠映源 蔣壩外委清河 羅福階 從九品咸豐十一年

戰不 王錫湧 從九品咸豐九年賊 葛錫紳 侯嘉東 監生 周三泰

勝死 張繼忠 刑書咸豐九年遇賊 汪步高 把總咸豐九年

生 汪萬成 外委咸豐九年五月 成永庚 監生 胡大有 咸豐九年

遇賊 陳錫福 文生咸豐九年 張承昱 咸豐十年賊至率 談

死 夢齡 監生與童生談銘均於咸豐十年 朱懋時 賊陷都管塘率

練戰 秦運 文生咸豐九年賊至 楊志喜 貢生咸豐十年

死 塘舉家 朱廷猷 咸豐九年賊至 傅鴻業 監生成豐九年

死 孫嘉禾 殉 張銘泰 咸豐九年賊陷盱眙其父被擄 秦

之 瀟 咸豐九年賊至瀟被戕 其妻見夫亡亦投水死

補遺

唐武誼字子思楚州盱眙人咸通中為楚州從事著自

古忠臣錄二十卷 新唐書 藝文志

五代劉金 歐陽修 菱谿石記 菱谿之石有六其四為人

偃然僵臥於谿側以其難徙故得獨存每歲寒霜落水

與經皆不載唐會昌中刺史李漬為苻谿記云水出永

陽嶺西經皇道山下以地求之今無所謂苻谿者詢於

滁人曰此谿是也楊行密據淮南淮人為諱其嫌名以

苻為菱理或然也谿傍若有遺址云故將劉金之宅石

卽劉氏之物也金偽吳時貴將與行密俱起合淝號三

十六英雄金其一也金本武夫悍卒而乃能知愛賞奇

異為兒女子之好豈非遭逢亂世功成志得驕於富貴

一時之盛哉今劉氏之後散為編氓尚有居谿旁者子

感夫人物之廢興惜其可愛而反棄也乃以三牛曳置

幽谷又索其小者得於白塔民朱氏遂立于亭之南北
 亭負城而近以為除人歲時嬉遊之好夫物之奇者棄
 沒于幽遠則可惜置之耳目則愛者不免取之而去嗟
 夫劉金者雖不足道然亦可謂雄勇之士其平生志意
 豈不偉哉及其後世荒堙零落至於子孫沒而無聞
 況欲長有此石乎用此可為富貴者之戒而好奇之士
 聞此石者可以一賞而足何必取而去也哉 姚薑塢
 云劉金吳時為濠滁二州刺史長子仁規次即劉仁贍
 也公於五代史記中劉仁贍傳內亦具之
 而此記云子孫泯沒無聞豈忽忘之邪
 宋杜輿 蘇軾黃州與杜子師書某啟辱書承晚來起居
 佳勝示及畫圖覽之愧汗不惟犯孟子柳宗元
 之禁又使多言者得造風波甚非相愛之道也謹卻封
 納從者已多日離親側唯以蚤還為宜進道外千萬倍
 加愛養入夜草草不宣又揚州與杜子師書某啟辱書
 因循不即裁謝專人惠簡祇增愧悚比日起居佳勝某
 今晚到泗州來日隨早晚行不出十六七日到揚如欲
 相見可少留相待或附客舟路邂逅也若已由天長
 路奔還即不及矣惟千萬保愛進學術以就遠業不宣
 又惠州與杜子師書某啟貶竄皆愚暗自取罪大罰輕

感恩念咎之外畧不置胸中也得喪常理正如子師及
 第落解爾如別紙所論甚非見愛之道此等語切冀默
 之餘非面莫悉又北歸與杜子師書某啟泗上為別忽
 已八年思企深矣專人辱手書承起居佳福至慰某已
 到儀真少幹當留旬日舍弟欲同居願昌月未遂
 北上矣非久會面欣慙之極人還謹奉啟不宣

國朝馮應京 呂坤代呂益軒祭馮慕岡文嗚呼慕岡天
 植忠貞山嶽磊磊鐵石錚錚昔陳璫之煽

燄烹焚金楚豈無當事重臣保姦回而為我公獨犯手
 濡足覆翼楚人為殃竟一疾而不起頃純如有徒河之役

里何二豎之為司寇道及我公謂海內賢豪公當魁亞
 往復寧陵見呂司寇道及我公謂海內賢豪公當魁亞

懷抱社稷蒼生背負家國天下敏練精識康濟弘才儻
 緩急所時有斯固其人哉公與司寇未交一言及讀實

政諸刻半取司寇常談乃知心一同道同不必造膝比肩
 公年甫五十精力未艾其縹緲之痕余竟葆攝其莫濟

嗚呼伯寮惑志或可籲天宇宙之多人矣何賢者之獨
 殲豈彼蒼蒼亦惡君子箇中三五哲人頻年淪胥以死

天若祚宋實賴斯人之云亡匪獨君子之屯公若有
 知舊環可探苟一念不忘吾君來世當畢其願純如一

于台系示 卷九 人物 二

命所羈撫棺未能走雞絮以
告虔知我公不棄夫生平

補遺

陳雲松字子材號磬泉祖道父大閑雲松四歲失怙恃
鞠於庶祖母曹以祖廕爲國子生補南京都督府知事
升本府經歷甫弱冠以廉著講學於湛甘泉之門升韶
州知府調鄖陽韶俗強悍鄖阻萬山並稱難治雲松嚴
而有體察而不苛故民惴服歷升長蘆運司苑馬寺正
卿陝西布政司叅政長蘆號外府泉貨委積雲松去任
宦藏得舊羨金吏白俱官府堂食雲松曰堂食自有祿
人又食此哉立趨解部爲叅政年方盛乃浩然乞休歸
時圖書數卷而已於庶祖母生事死哀所以報其鞠養

者甚厚清操至情為世所稱

